

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-02-230/25
Tuzla, 16.01.2025. godine

Na osnovu člana 5. i 29. Zakona o Vladi Tuzlanskog kantona ("Službene novine Tuzlanskog kantona", br. 17/00, 1/05, 11/06, 13/11 i 15/17), Vlada Tuzlanskog kantona na sjednici održanoj dana 16.01.2025. godine, donosi

ODLUKU
o utvrđivanju prijedloga Zakona

I

Utvrđuje se prijedlog Zakona o oružju i municiji.

II


Prijedlog Zakona iz tačke I ove Odluke uputit će se Skupštini Tuzlanskog kantona na razmatranje i donošenje.

III

Odluka stupa na snagu danom donošenja.

DOSTAVITI:

- 1 x Skupštini Tuzlanskog kantona
- 1 x Ministarstvu unutrašnjih poslova
- 1 x Evidenciji
- 1 x a/a



PREMIJER KANTONA

Irfan Halilagić

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

PRIJEDLOG

ZAKON O ORUŽJU I MUNICIJI

Tuzla, januar 2025. godine

Na osnovu člana 24. stav (1) tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04) na prijedlog Vlade Tuzlanskog kantona, Skupština Tuzlanskog kantona, na sjednici održanoj dana _____ godine, donosi

ZAKON O ORUŽJU I MUNICIJI

DIO PRVI - OSNOVNE ODREDBE

Član 1.

(Predmet zakona)

Ovim zakonom uređuju se kategorije oružja, nabavljanje i posjedovanje oružja, bitnih dijelova oružja i municije, postupanje sa oružjem i municijom, oduzimanje oružja, bitnih dijelova oružja, municije i isprava o oružju, trgovina oružjem, bitnim dijelovima oružja i municijom, popravljanje, modifikacija ili prepravljanje oružja i bitnih dijelova oružja, posredovanje, onesposobljavanje oružja, civilna strelišta, mehanički trag vatrenog oružja, nadzor nad primjenom ovog zakona, vođenje evidencija, amnestija i legalizacija oružja i zamjena isprava o oružju na području Tuzlanskog kantona.

Član 2.

(Svrha donošenja zakona)

Svrha donošenja ovog Zakona je usklađivanje propisa iz oblasti oružja i municije sa Direktivama Vijeća od 18. juna 1991. godine o nadzoru nabavke i posjedovanja oružja broj 91/477/EEZ, Direktivom broj 2008/51/EZ Europskog parlamenta i Vijeća od 21. maja 2008. godine o izmjeni Direktive Vijeća 91/477/EEZ o nadzoru nabavke i posjedovanja oružja, Direktivom (EU) 2017/853 Europskog parlamenta i Vijeća od 17. maja 2017. godine o izmjeni Direktive Vijeća 91/477/EEZ o nadzoru nabavke i posjedovanja oružja i Direktivom Europskog Parlamenta i Vijeća Europske unije od 24.03.2021.godine o nadzoru nabavke i posjedovanja oružja broj: 2021/555.

Član 3.

(Definicije)

(1) Oružje je svako vatreno oružje i oružje koje nije vatreno u skladu sa ovim zakonom i drugim posebnim zakonima u Bosni i Hercegovini i to:

- a) vatreno oružje je svako prijenosno cijevno oružje koje ispaljuje, služi za ispaljivanje ili se može prepraviti za ispaljivanje sačme, zrna ili projektila djelovanjem zapaljivog potisnog sredstva, osim predmeta koji su izrađeni za uzbunjivanje, signaliziranje, spašavanje života, ubijanje životinja, lov harpunom ili u industrijske ili tehničke svrhe, pod uslovom da se mogu upotrebljavati samo u navedene svrhe i ako se smatraju starim oružjem, s tim da se ne odnose na kategorije iz člana 7. ovog zakona. Smatra se da je neki predmet sposoban za prepravljanje kako bi ispaljivao sačmu, zrno ili projektil djelovanjem zapaljivog potisnog sredstva, ako ima izgled vatrenog oružja i ako ga je moguće prepraviti zbog njegove konstrukcije ili materijala od kojeg je izgrađen;
- b) bitan dio oružja (u daljem tekstu: bitan dio) znači cijev, kućište, uvodnik metaka, uključujući i gornji i donji uvodnik, ako je primjenjivo, vodilica, cilindar, zatvarač ili nosač zatvarača koji su, s obzirom na to da su odvojeni predmeti, uključeni u kategoriju vatrenog oružja na koje su postavljeni ili na koje se namjeravaju postaviti;
- c) oružje za ličnu zaštitu čine pištolji i revolveri kalibra 4,8 mm i veći;

- d) kratko vatreno oružje je oružje čija cijev nije duža od 30 cm ili čija ukupna dužina oružja ne prelazi 60 cm;
- e) dugo vatreno oružje je svako vatreno oružje osim kratkog vatrenog oružja;
- f) lovačko oružje je vatreno oružje kategorije B sa kojim se smije loviti divljač u skladu s propisima o lovstvu;
- g) sportsko oružje je dugo vatreno oružje glatkih cijevi do kalibra 12, olučenih cijevi do kalibra 12,7 mm, odnosno 0,50 inča, kratko vatreno oružje do kalibra 11,43 mm, odnosno 0,45 inča, pištolji i revolveri velikog kalibra podešeni za sportske svrhe, malokalibarske puške i malokalibarski pištolji i revolveri kalibra 5,6 mm sa ivičnim paljenjem sa olučenim (užlijebljenim) ili neolučenim (glatkim) cijevima, vazdušne puške, vazdušni pištolji, revolveri, oružje sa tetivom, kao i drugo oružje koje se koristi u sportskim disciplinama u skladu s propisima o sportu;
- h) vatreno oružje s jednostrukim okidanjem je vatreno oružje koje nema spremnik koje se prije svakog hica puni ručnim ubacivanjem naboja u komoru ili u nišu za punjenje na poklopcu cijevi;
- i) automatsko vatreno oružje je svako vatreno oružje koje se nakon hica automatski napuni i koje može ispaliti više od jednog naboja jednokratnim pritiskanjem obarača;
- j) poluautomatsko vatreno oružje je oružje koje je nakon ispaljivanja svakog metka ponovo pripravno za ispaljivanje i kod kojeg je iz cijevi jednokratnim pritiskanjem obarača moguće ispaljivati samo po jedno zrno;
- k) vatreno oružje s repetirajućim mehanizmom je oružje kod kojeg je nakon ispaljivanja svakog metka potrebno ručno preko mehanizma ubaciti zrno u cijev;
- l) kombinovano oružje je oružje sa dvije ili više olučenih (užlijebljenih) i neolučenih (glatkih) cijevi različitog kalibra;
- m) trofejno oružje je vatreno, vazdušno i hladno oružje koje se čuva kao uspomena i predstavlja ličnu ili porodičnu uspomenu, a koje je trajno onesposobljeno za upotrebu;
- n) staro oružje je oružje koje je proizvedeno prije 1895. godine i/ili oružje koje se puni sa usta cijevi crnim barutom i koje se pali kremenom, fitiljem ili kapislom i koje predstavlja kulturno nasljeđe ili ima istorijsku vrijednost i nije više u upotrebi;
- o) onesposobljeno vatreno oružje je vatreno oružje koje je trajno onesposobljeno za upotrebu, osiguravajući da su svi bitni dijelovi dotičnog vatrenog oružja postali trajno neupotrebljivi i da ih nije moguće ukloniti, zamijeniti ili modificirati kako bi se vatreno oružje na bilo koji način ponovo aktiviralo;
- p) vazdušno oružje su sve vrste pušaka, pištolja, revolvera i druge naprave koje pod pritiskom vazduha, opruge ili ugljen dioksida izbacuju metalne kuglice ili druge projekte;
- q) airsoft i paintball naprave su puške i pištolji, odnosno sportski rekviziti namijenjeni izbacivanju plastičnih, gumenih ili želatinoznih projektila na isti način kao i vazdušno oružje, s tim da mogu imati veći kalibar od vazdušnog oružja i mogu raditi u automatskom režimu i da je energija projektila manja od energije vazdušnog oružja;
- r) gasno/plinsko oružje su puške, pištolji i revolveri i druge naprave koje pod pritiskom barutnog ili sabijenog gasa/plina raspršuju nadražljive tvari za onesposobljavanje pojedinca koje na ljudsko zdravlje imaju kratkotrajan učinak;
- s) oružje za uzbuđivanje i signalizaciju su naprave s ležištem municije namijenjene samo za ispaljivanje municije bez projektila izazivanjem glasnog pucnja, neškodljivih nadražujućih tvari (kloracetofenon, ortoklorbenzen - malon - dinitril i oleoresin capsicum), drugih aktivnih tvari ili pirotehničke municije za signalizaciju (svijetleće signalne rakete), te koje se ne mogu prepraviti za ispaljivanje sačme, zrna ili projektila djelovanjem zapaljivog potisnog sredstva;
- t) konvertibilno oružje je gasno, startno i signalno oružje, kao i svako drugo oružje koje ima cijev i izgledom podsjeća na vatreno oružje i koje se, s obzirom na konstrukciju i materijal od koga je napravljeno, može prepraviti tako da ispaljuje bojevu municiju;

- u) hladno oružje je oružje koje ne uključuje vatru ili eksploziju kao rezultat upotrebe baruta ili drugih eksplozivnih materija. U hladno oružje spada ručno borbeno oružje za blizak kontakt ili bilo koje oružje koje se koristi u direktnoj borbi, odnosno noževi, bodeži, bajoneti, skakavci čije se sječivo nalazi pod pritiskom sabijene opruge a iz drške iskaču pod pritiskom na dugme ili polugu, bokseri, kao i drugi predmeti pogodni za nanošenje povreda kada se koriste na javnom mjestu.
- v) Oružje sa tetivom jeste svako oružje koje može da djeluje na mete van udaljenosti prsa u prsa, u koje spadaju: lukovi, samostreli i druge naprave koje snagom napete tetive ili druge elastične materije potiskuju strijelu ili drugi projektil.
- w) Ručno borbeno oružje je ručno oružje ili oružje za blizak kontakt ili bilo koje oružje koje se koristi u direktnoj borbi prsa u prsa;
- x) paradno i akustično oružje je vatreno oružje koje je posebno prepravljeno za isključivu upotrebu ispaljivanja municije bez projektila, za upotrebu u pozorišnim predstavama, fotografiranju, filmskom i televizijskom snimanju, rekonstrukciji istorijskih događaja, povorkama, sportskim događajima i obuci;
- y) reprodukcije oružja je oružje izrađeno da izgleda kao neko specifično oružje, a koje može i funkcionisati kao oružje;
- z) dekorativno oružje (imitacije oružja) su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje;
- aa) registrovano oružje je oružje za koje je izdata odgovarajuća isprava o oružju.

(2) Municija su meci kao cjelina ili njegovi sastavni dijelovi, uključujući čahure, inicijalne kapisle, potisno punjenje, zrna ili projektili koji se koriste u vatrenom oružju, a koja se nabavlja na osnovu važeće isprave o oružju i to:

- a) municija s probojnim učinkom je municija za vojnu upotrebu pri čemu je projektil presvučen košuljicom i ima čvrstu probojnu jezgru;
- b) municija s eksplozivnim projektilima je vojna municija koja sadrži punjenje koje eksplodira prilikom udara;
- c) municija sa zapaljivim projektilima je vojna municija kod kojeg projektil sadrži hemijsku smjesu koja se zapali prilikom dodira sa zrakom ili prilikom udara;
- d) projektil je sastavni dio metka.

(3) Lažna municija je municija koja ne sadrži inicijalnu kapislu, barutno ili eksplozivno punjenje;

(4) Nadležna policijska uprava Uprave policije Ministarstva unutrašnjih poslova Tuzlanskog kantona prema mjestu prebivališta, odnosno sjedišta podnosioca zahtjeva (u daljem tekstu: nadležna policijska uprava) istom izdaje isprave o oružju i to:

- a) odobrenje za nabavljanje i posjedovanje vatrenog oružja je isprava o oružju na osnovu koje fizička i pravna lica mogu nabaviti i posjedovati vatreno oružje;
- b) odobrenje za držanje vatrenog oružja je isprava o oružju koja se izdaje pravnom licu za držanje vatrenog oružja;
- c) oružni list je isprava o oružju na osnovu koje se drži oružje, u skladu sa ovim zakonom i sadrži podatke o oružju (vrstu, marku, model, kalibar, serijski broj vatrenog oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku, ako je drugačija od oznake na kućištu ili uvodniku metaka vatrenog oružja) i podatke o vlasniku oružja (ime i prezime, datum i mjesto rođenja, država rođenja, jedinstveni matični broj i adresa stanovanja);
- d) dozvola za nošenje vatrenog oružja je isprava na osnovu koje fizičko lice ima pravo nošenja pištolja ili revolvera registrovanog za ličnu sigurnost kategorije B;
- e) odobrenje za sakupljanje i držanje starog oružja je isprava o oružju koja omogućava fizičkom i pravnom licu sakupljanje i držanje starog oružja bez prava nošenja;
- f) kolekcionarska dozvola je isprava za sakupljanje i držanje starog oružja koja se izdaje fizičkom i pravnom licu (kolekcionaru) koje posjeduje više od deset komada različitog registrovanog oružja, bez prava nošenja;

- g) potvrda o prijavi oružja je isprava koju izdaje nadležna policijska uprava za oružje kategorije C
- h) uvjerenje o ispunjavanju uslova za neposredno rukovanje oružjem i municijom je isprava o oružju koja se radi obavljanja djelatnosti izdaje fizičkom odnosno odgovornom licu u pravnom licu ili fizičkom licu radi obavljanja poslova zaštite i čuvanja, kao i drugim fizičkim licima koji neposredno rukuju sa oružjem i municijom;
- i) potvrda za nošenje oružja i municije je isprava koja se izdaje članu streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta;
- j) potvrda za prenošenje oružja i municije je isprava koja se izdaje članu streljačke ili lovačke organizacije ili fizičkom licu koje obavlja poslove zaštite ili čuvaru šuma, lovišta i ribolovišta, u svrhu prenošenja oružja i municije.

(5) U postupcima koji su uređeni ovim zakonom učestvuju sljedeći subjekti:

- a) vlasnik oružja je fizičko ili pravno lice kome je izdata odgovarajuća isprava o oružju;
- b) trgovac oružjem je pravno lice ili fizičko lice registrirano za obavljanje djelatnosti čija se trgovina ili poslovanje sastoji u cjelini ili djelimično od trgovine, razmjene, popravke, modifikacije ili prepravljanja vatrenog oružja ili bitnih dijelova ili trgovine, razmjene, modifikacije ili prepravljanja municije;
- c) posrednik je svako fizičko ili pravno lice, koje nije trgovac oružjem, čija se trgovina ili poslovanje sastoji u cjelini ili djelimično od pregovaranja ili ugovaranja transakcija za kupovinu ili prodaju vatrenog oružja, bitnih dijelova ili municije ili opskrbu njima;
- d) kolekcionar je svako fizičko ili pravno lice posvećeno prikupljanju i očuvanju vatrenog oružja, bitnih dijelova ili municije u historijske, kulturne, znanstvene, tehničke i obrazovne svrhe ili svrhe očuvanja nasljeđa;
- e) čuvari su fizička lica koja su u skladu sa Zakonom o agencijama i unutrašnjim službama za zaštitu ljudi i imovine ("Službene novine Federacije Bosne i Hercegovine", broj: 78/08 i 67/13 u radnom odnosu u agencijama za zaštitu ljudi i imovine ili u pravnim licima koja su organizirala vlastitu unutrašnju službu i koji su angažirani na poslovima fizičke zaštite ljudi i imovine;
- f) lovočuvari su fizička lica koja u lovočuvarskoj službi u skladu sa Zakonom o lovstvu ("Službene novine Federacije Bosne i Hercegovine", broj: 4/06, 8/10 i 81/14) obavljaju poslove zaštite i čuvanja lovišta;
- g) čuvari šuma su fizička lica koja u čuvarskoj službi u skladu sa Zakonom o šumama ("Službene novine Tuzlanskog kantona", broj: 7/17, 8/20, 3/21 i 14/22), obavljaju poslove zaštite i čuvanja šuma i šumskih zemljišta.

(6) U postupcima koji su uređeni ovim zakonom poduzimaju se sljedeće radnje:

- a) registracija oružja je unos podataka o oružju (vrstu, marku, model, kalibar, serijski broj vatrenog oružja i oznaku na njegovom kućištu ili uvodniku metaka), unos podataka o bitnim dijelovima (serijski broj ili jedinstvenu oznaku, ako je drugačija od oznake na kućištu ili uvodniku metaka vatrenog oružja) i unos podataka o vlasniku oružja (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa stanovanja) u službene evidencije propisane ovim zakonom, kao i propisima donijetim na osnovu ovog zakona, uz izdavanje odgovarajuće isprave o oružju;
- b) držanje oružja je radnja koja podrazumijeva držanje i posjedovanje oružja na osnovu oružnog lista ili odobrenja za držanje oružja;
- c) nošenje oružja je radnja koja podrazumijeva nošenje oružja na osnovu odgovarajuće isprave o oružju;
- d) prenošenje vatrenog oružja je radnja koja podrazumijeva da se oružje koje se drži na osnovu odobrenja ili odgovarajuće isprave o oružju, uz prethodnu prijavu nadležnoj policijskoj upravi, može prenositi u slučaju promjene prebivališta ili boravišta fizičkog lica ili promjene sjedišta pravnog lica, popravke, modifikacije ili prepravke oružja, smrti vlasnika, odnosno korisnika oružja, odlaska u lov, na sportsko takmičenje, na strelješte ili u drugim opravdanim slučajevima;
- e) popravljavanje oružja je otklanjanje kvarova na oružju, zamjena ili ugradnja originalnih dijelova;

- f) modifikacija ili prepravljanje oružja je prilagođavanje oružja drugoj municiji ili svojoj prvobitnoj svrsi, zamjena ili ugradnja bitnih dijelova i drugi zahvati na oružju kojima se utiče na njegovo funkcionisanje ili na tehnička svojstva;
- g) dobrovoljna predaja oružja, bitnih dijelova i municije podrazumijeva jasnu i nedvojbenu izjavu vlasnika ili nekog drugog lica koje ima opravdan interes, da oružje, bitne dijelove i municiju dobrovoljno predaje nadležnoj policijskoj upravi.

(7) Civilno streljište je otvoreni ili zatvoreni objekat (streljana) koji može biti i vojno streljište dopušteno za civilnu upotrebu ili drugo službeno streljište, namijenjen sportsko-rekreativnom gađanju i edukaciji, koji ispunjava tehničke i sigurnosne uslove za upotrebu registrovanog ili prijavljenog oružja;

(8) Muzej ustanova u oblasti kulture u službi društva i njegovog razvoja, otvorena javnosti, u kojoj se nabavlja, čuva, istražuje i izlaže vatreno oružje, bitni dijelovi ili municija u istorijske, kulturne, znanstvene, tehničke i obrazovne svrhe, te svrhe očuvanja nasljeđa ili rekreativne svrhe;

(9) Električni paralizator (elektrošoker) je ručna naprava koja pomoću visokog električnog napona privremeno onemogućava lice;

(10) Sprej za omamljivanje je naprava namijenjena civilnom tržištu, koja sadrži i prilikom upotrebe raspršuje nadražujuća hemijska jedinjenja u koncentracijama dozvoljenim po prihvaćenim međunarodnim standardima;

(11) Optički nišan je naprava kojom se oružju povećava preciznost;

(12) Minsko-eksplozivna sredstva su sve vrste bombi, mina, granata i drugih naprava opremljenih s eksplozivnom materijom ili detonatorom, (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja;

(13) Mužari-prangije su ručne ili samostojeće naprave namijenjene za izazivanje glasnog pucnja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine;

(14) Posebna oprema za vatreno oružje je svaki mehanizam namijenjen kao dodatak za osnovni model oružja, čijom primjenom se mijenjaju mogućnosti kod upotrebe oružja, osim optičkog nišana;

(15) Ispitivanje vatrenog oružja je provjeravanje ispravnosti funkcionisanja oružja i ispravnosti pojedinih dijelova vatrenog oružja, te kontrola izdržljivosti cijevi i drugih odgovarajućih dijelova pod određenim pritiskom;

(16) Obilježavanje žigom vatrenog oružja je utiskivanje propisanih žigova na određene dijelove vatrenog oružja za koje je ispitivanjem utvrđena ispravnost;

(17) Tehnički pregled vatrenog oružja je pregled koji se obavlja radi provjere tehničke ispravnosti oružja;

(18) Mehanički trag vatrenog oružja je trag koji nastaje upotrebom vatrenog oružja i koji dijelovi vatrenog oružja kao što su čelo zatvarača, izvlakač, izbacivač, udarna igla, polja i žljebovi cijevi ostavljaju na zrnu i čahuri metka ispaljenog iz vatrenog oružja;

(19) Amnestija lica je oslobađanje od odgovornosti za nelegalno posjedovanje oružja kategorije B, prilikom dobrovoljne predaje istog;

(20) Legalizacija oružja je postupak registracije neregistrovanog oružja kategorije B koje je lice posjedovalo bez odobrenja za nabavljanje oružja, a za koje nije potrebno dokazivati porijeklo oružja.

Član 4. **(Primjena zakona)**

(1) Fizička i pravna lica mogu nabavljati, posjedovati i nositi oružje, bitne dijelove i municiju samo po odredbama ovog zakona.

(2) Odredbe ovog zakona primjenjuju se i na strane državljane sa stalnim boravkom ili privremenim boravkom na području Tuzlanskog kantona dužim od jedne godine. Privremeni boravak duži od jedne godine podrazumijeva kontinuirano produženje privremenog boravka po istom osnovu po kojem je stranom državljanu odobren privremeni boravak čije produženje traži.

(3) Odredbe ovog zakona ne odnose se na oružje i municiju za potrebe Oružanih snaga Bosne i Hercegovine, policijskih organa, sudske policije, kazneno popravnih ustanova, Obavještajno - sigurnosne agencije Bosne i Hercegovine i na druge državne organe kada nabavljaju, drže i nose oružje i municiju po posebnim propisima

(4) Prenosjenje oružja, i municije preko državne granice Bosne i Hercegovine vrši se u skladu sa odredbama Zakona o graničnoj kontroli ("Službeni glasnik Bosne i Hercegovine", broj: 53/09, 54/10 i 47/14).

(5) Lica sa područja drugog entiteta, kantona ili Brčko Distrikta Bosne i Hercegovine imaju pravo nošenja oružja na području Tuzlanskog kantona uz odgovarajuću važeću ispravu za to oružje izdatu od strane nadležnog organa.

(6) Kretanje oružja, bitnih dijelova i municije vrši se u skladu sa Zakonom o kontroli kretanja oružja i vojne opreme ("Službeni glasnik Bosne i Hercegovine", broj: 53/09 i 22/16).

Član 5.

(Izuzeci)

(1) Lica mlađa od 18 godina, ne mogu nabavljati, držati i nositi električni paralizator snage ispod 10.000 Volti, sprej za omamljivanje, vazdušno oružje čija je kinetička energija manja od 10,5 J ili je brzina projektila manja od 200 m/s i kalibra 4,5mm, oružje sa tetivom čija je sila zatezanja tetive manja od 450 Njutna, odnosno čija je natezna težina manja od 101 libre/45 kilograma i airsoft i paintball naprave.

(2) Izuzetno, sprej za omamljivanje iz stava (1) ovog člana mogu nabavljati, držati i nositi lica starija od 15 godina, kao i pravna lica i obrtnici.

(3) Izuzetno, djeca starija od 9 godina smiju koristiti oružje iz stava (1) ovog člana na sportskim streljštima i drugim mjestima određenim i uređenim za vježbe gađanja pod nadzorom trenera koji ispunjava uslove iz člana 10. ovog zakona i uslove propisane posebnim propisom o sportu i pod uslovom da imaju saglasnost oba roditelja ili staratelja.

Član 6.

(Primjena Zakona o upravnom postupku)

(1) U postupcima koji se vode prema ovom zakonu primjenjuju se odredbe Zakona o upravnom postupku ("Službene novine Federacije Bosne i Hercegovine", broj: 2/98, 48/99 i 61/22).

(2) O zahtjevima za izdavanje odobrenja iz ovog zakona odlučuje se rješenjem.

(3) Ukoliko se zahtjevi za izdavanje odobrenja iz ovog zakona odbijaju zbog kriminalističko - obavještajnih razloga ili zbog razloga koji ukazuju na povezanost sa licima iz kriminalističko - obavještajne evidencije iz člana 10. stav (2) tačka f) ovog zakona u rješenju se neće posebno obrazlagati utvrđeno činjenično stanje.

(4) Protiv rješenja i zaključaka donesenih na osnovu ovog zakona može se izjaviti žalba Upravi policije Ministarstva unutrašnjih poslova Tuzlanskog kantona (u daljem tekstu: Uprava policije) u roku od 15 dana od dana prijema rješenja ili zaključka.

DIO DRUGI – ORUŽJE I MUNICIJA

POGLAVLJE I. KATEGORIZACIJA ORUŽJA

Član 7.

(Kategorizacija oružja)

Oružje se prema odredbama ovog Zakona razvrstava u tri kategorije:

a) kategorija A - zabranjeno oružje:

1) minsko-eksplozivna sredstva i dijelovi;

2) eksplozivni vojni projektili i bacači;

- 3) automatsko vatreno oružje;
 - 4) vatreno oružje koje je skriveno u drugim predmetima;
 - 5) municija s probojnim, eksplozivnim ili zapaljivim projektilima, te projektili za takvu municiju;
 - 6) municija za pištolje i revolvere koje ima ekspanzijski učinak, te meci za takvu municiju, osim municije za lov ili sportsko oružje za osobe kojima je dozvoljeno koristiti ga;
 - 7) sve vrste oružja s integralnim prigušivačima, prigušivači namijenjeni oružju i dijelovi za prigušivače;
 - 8) automatsko vatreno oružje koje je prepravljeno u poluautomatsko vatreno oružje; ne dovodeći u pitanje član 10. (5) Direktive Evropskog Parlamenta i Vijeća Europske unije broj: 2021/555 o nadzoru nabavke i posjedovanja oružja od 24.03.2021.godine
 - 9) bilo koje od sljedećeg poluautomatskog vatrene oružja sa centralnom udarnom iglom:
 - kratko vatreno oružje koje omogućuje ispaljivanje više od 21 naboja bez ponovnog punjenja ako je spremnik kapaciteta većeg od 20 naboja dio tog vatrene oružja ili se u njega umeće odvojivi spremnik kapaciteta većeg od 20 naboja,
 - dugo vatreno oružje koje omogućuje ispaljivanje više od 11 naboja bez ponovnog punjenja ako je spremnik kapaciteta većeg od 10 naboja dio vatrene oružja ili se u njega umeće odvojivi spremnik kapaciteta većeg od 10 naboja;
 - 10) Poluautomatsko dugoo vatreno oružje, to jest vatreno oružje izvorno namijenjeno ispaljivanju s ramena koje se može smanjiti na dužinu manju od 60 cm, a da ne izgubi svoju funkciju, odnosno sklopivim ili teleskopskim nastavkom ili nastavkom koji se može ukloniti bez upotrebe alata.
 - 11) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje;
 - 12) posebna oprema za vatreno oružje;
 - 13) poluautomatsko vatreno oružje za civilnu upotrebu koje je slično oružju s automatskim mehanizmom osim onog navedenog u tački 8., 9. i 10. ovog člana;
 - 14) sve vrste oružja s integralnim prigušivačima, prigušivači namijenjeni oružju i dijelovi za prigušivače;
 - 15) ostalo vatreno oružje koje nije obuhvaćeno ostalim kategorijama.
- b) kategorija B – oružje za koje je potrebno odobrenje:
- 1) repetirajuće kratko vatreno oružje;
 - 2) jednostrijelno kratkocijevno vatreno oružje sa centralnom udarnom iglom;
 - 3) jednostrijelno kratkocijevno vatreno oružje s rubnim paljenjem, ukupne dužine do 28 cm;
 - 4) poluautomatsko dugocijevno vatreno oružje kod kojeg spremnik i ležište naboja zajedno primaju više od tri naboja, u slučaju vatrene oružja s rubnim paljenjem, odnosno više od tri, ali manje od 12 naboja, u slučaju vatrene oružja sa centralnom udarnom iglom;
 - 5) poluautomatsko kratkocijevno vatreno oružje, osim onog navedenog u tački a) podtačka 9) kategorije A ovog člana;
 - 6) poluautomatsko dugocijevno vatreno oružje navedeno u tački a) podtačka 9) kategorije A ovog člana, kod kojeg spremnik i ležište naboja ne mogu zajedno primiti više od tri naboja, pri čemu se spremnik može odvojiti, odnosno nije sigurno da se uobičajenim alatom ne može prepraviti u oružje kod kojeg spremnik i ležište naboja zajedno primaju više od tri naboja;
 - 7) repetirajuće i poluautomatsko dugocijevno vatreno oružje sa glatkom cijevi ukupne dužine do 60 cm;
 - 8) svako vatreno oružje u ovoj kategoriji koje je prepravljeno da ispaljuje municiju bez projektila, neškodljive nadražujuće tvari, druge aktivne tvari ili pirotehničku municiju ili u paradno ili akustično oružje;
 - 9) poluautomatsko vatreno oružje za civilnu upotrebu koje je slično oružju sa automatskim mehanizmom, osim onog navedenog u tački a) podtačka 8), 9) i 10) kategorije A ovog člana;
 - 10) repetirajuće dugocijevno vatreno oružje, osim onog navedenog u tački b) podtačka 7) kategorije B ovog člana;
 - 11) dugocijevno oružje s jednom ili više jednostrijelnih užlijebljenih cijevi;
 - 12) poluautomatsko dugocijevno vatreno oružje, osim onog navedenog u kategoriji A;
 - 13) jednostrijelno kratkocijevno oružje s rubnim paljenjem ukupne dužine najmanje 28 cm;

- 14) dugo vatreno oružje s jednostrukim okidanjem i glatkim cijevima;
 - 15) lovačko oružje u skladu sa Zakonom o lovstvu.
- c) kategorija C – oružje koje je potrebno prijaviti:
- 1) Svako vatreno oružje u ovoj kategoriji koje je prepravljeno da ispaljuje streljivo bez projektila, neškodljive nadražujuće tvari, druge aktivne tvari ili pirotehničko streljivo ili u paradno ili akustično oružje;
 - 2) Vatreno oružje razvrstano u kategoriju A ili B ili u ovu kategoriju koje je onesposobljeno u skladu s Provedbenom uredbom (EU) 2015/2403;
 - 3) Paradno i akustično oružje;
 - 4) Oružje s tetivom čija je sila zatezanja tetive veća od 450 N ili veća, odnosno čija je natezna težina veća od 101 libre/45 kg ili veća;
 - 5) Vazdušno oružje čija je kinetička energija 10,5 J ili veća ili je brzina projektila 200 m/s ili veća i kalibra većeg od 4,5mm;
 - 6) Prangija;
 - 7) Trofejno oružje;
 - 8) Električni paralizatori preko 10.000 volti;
 - 9) Signalno oružje;
 - 10) Plinsko oružje/gasno oružje;
 - 11) Reprodukcijska oružja.

Član 8.

(Ograničenja)

- (1) Zabranjeno je nabavljanje, posjedovanje, držanje ili nošenje, trgovina, pregovaranje ili ugovaranje transakcija za kupovinu ili prodaju vatrenog oružja, bitnih dijelova i municije ili opskrba njima ili dogovaranje transfera vatrenog oružja, bitnih dijelova i municije kategorije A, osim ako ovim zakonom nije drugačije propisano.
- (2) Nabavljanje, posjedovanje i nošenje poluautomatskog vatrenog oružja sa centralnom udarnom iglom iz člana 7. stav (1) tačka a) podtačka 9) ovog zakona može se odobriti sportskim strijelcima ako:
 - a) ispunjavaju opće i posebne uslove iz člana 10. ovog zakona;
 - b) aktivno vježbaju za sudjelovanje u streljačkim takmičenjima koje priznaje službeno priznata sportska streljačka organizacija ili međunarodni i službeno priznati sportski streljački savez;
 - c) posjeduju potvrdu službeno priznate sportske streljačke organizacije u kojoj je navedeno da je sportski strijelac član streljačkog kluba i da se redovno, najmanje 12 mjeseci bavi streljaštvom u tom klubu i da vatreno oružje ispunjava tražene specifikacije za streljačku disciplinu koju priznaje međunarodni i službeno priznati sportski streljački savez.
- (3) Zabranjeno je nabavljanje, posjedovanje, držanje i trgovina hladnog oružja kojem je osnovna namjena napad ili nanošenje ozljeda, te nošenje takvog hladnog oružja, osim u svrhu sportskog takmičenja.
- (4) Zabranjeno je nabavljanje, posjedovanje, držanje i trgovina podvodnih pušaka i drugih predmeta, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu.
- (5) Zabranjeno je nabavljanje, posjedovanje, držanje ili nošenje oružja i bitnih dijelova oružja kategorije B bez odgovarajuće isprave o oružju.
- (6) Fizičko lice može imati najviše jedan pištolj, jedan revolver, pet komada lovačkog oružja za koje su mu izdate isprave o oružju i pet komada sportskog oružja za aktivne članove sportskih streljačkih organizacija.
- (7) Odredbe stava (6) ovog člana ne odnose se na lica koja imaju registrovano oružje prije stupanja na snagu ovog zakona.
- (8) Oružje kategorije C nabavlja se u slobodnoj prodaji, a drži se ili nosi na osnovu izdate potvrde o prijavi oružja.
- (9) Oružje kategorije C može nabavljati, držati ili nositi lice koje je navršilo 21 godinu života.

(10) Naprave s ležištem municije oblikovane tako da mogu ispaljivati samo municiju bez projektila, neškodljive nadražujuće tvari, druge aktivne tvari ili pirotehničko signalnu municiju (oružje za uzbunjivanje i signalizaciju) zabranjeno je prepravljati za ispaljivanje sačme, zrna ili projektila djelovanjem zapaljivog potisnog sredstva.

(11) Zabranjeno je popravljanje, modifikacija ili prepravljanje vazdušnog, gasnog, airsoft i paintball naprava i reprodukcije oružja, za ispaljivanje bojeve municije, kao i svakog drugog oružja, osim onog navedenog u članu 59. ovog zakona.

POGLAVLJE II. NABAVLJANJE ORUŽJA, BITNIH DIJELOVA I MUNICIJE

Član 9.

(Podnošenje i postupak rješavanja zahtjeva)

(1) Zahtjev za izdavanje odobrenja za nabavljanje i posjedovanje vatrenog oružja i bitnih dijelova za fizička i pravna lica, zahtjev za nošenje vatrenog oružja, zahtjev za izdavanje uvjerenja o ispunjavanju uslova za neposredno rukovanje oružjem i municijom, zahtjev za izdavanje odobrenja za spravljanje municije, zahtjev za izdavanje odobrenja za nabavljanje eksplozivnih materija u svrhu spravljanja municije, zahtjev za izdavanje odobrenja za sakupljanje i držanje starog oružja, zahtjev za izdavanje odobrenja za nabavljanje oružja, bitnih dijelova i municije radi prodaje i zahtjev za izdavanje odobrenja za nabavljanje oružja za potrebe civilnog strelišta podnosi se na propisanom obrascu nadležnoj policijskoj upravi.

(2) Zahtjev za izdavanje i zamjenu oružnog lista, odobrenja za držanje vatrenog oružja, dozvole za nošenje vatrenog oružja i prijava za posjedovanje oružja kategorije C podnosi se na propisanom obrascu nadležnoj policijskoj upravi.

(3) Zahtjev za izdavanje odobrenja za provođenje obuke u rukovanju oružjem, odobrenja za obavljanje djelatnosti, trgovine, popravljanja, modifikacije ili prepravljanja i onesposobljavanja oružja i odobrenja za osnivanje civilnih strelišta podnosi se na propisanom obrascu nadležnoj policijskoj upravi.

(4) Obrazac zahtjeva iz stava (1), (2) i (3) ovog člana, kao i svih drugih zahtjeva vezanih za izdavanje isprava o oružju, te izgled i sadržaj obrazaca isprava o oružju i drugih dokumenata propisat će se pravilnikom koji donosi ministar unutrašnjih poslova Tuzlanskog kantona (u daljem tekstu ministar) na prijedlog direktora Uprave policije.

(5) Postupak rješavanja zahtjeva za izdavanje odobrenja za nabavljanje i posjedovanje oružja, izdavanje i zamjena isprava o oružju, kao i postupak izdavanja potvrda, obavještenja i drugih dokumenata, uredit će se pravilnikom koji donosi ministar na prijedlog direktora Uprave policije.

(6) Postupak rješavanja zahtjeva za provođenje obuke u rukovanju oružjem, odobrenja za obavljanje djelatnosti (trgovina, popravljanje, modifikacija ili prepravljanje i onesposobljavanje oružja) i odobrenja za osnivanje civilnih strelišta, uredit će se pravilnikom koji donosi ministar na prijedlog direktora Uprave policije.

(7) Imenovanje i način rada komisija i drugih učesnika u postupku ocjene ispunjavanja uslova, opravdanost zahtjeva za izdavanje odobrenja i isprava o oružju kao i uslovi za izdavanje odobrenja uredit će se pravilnikom koji donosi ministar na prijedlog direktora Uprave policije.

(8) Način i uslovi za siguran smještaj i čuvanje oružja i municije uredit će se pravilnikom koji donosi ministar na prijedlog direktora Uprave policije.

Član 10.

(Izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu)

(1) Nadležna policijska uprava izdat će fizičkom licu odobrenje za nabavljanje i posjedovanje vatrenog oružja i bitnih dijelova kategorije B ukoliko ispunjava opće i posebne uslove iz stava (2) i (3) ovog člana.

(2) Opći uslov za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu su:

- a) da je državljanin Bosne i Hercegovine ili stranac sa stalnim boravkom ili privremenim boravkom na području Tuzlanskog kantona dužim od jedne godine;
 - b) da je navršio 21 godinu života;
 - c) da ima opravdani razlog za nabavljanje i posjedovanje oružja i bitnih dijelova;
 - d) da nije osuđivan za krivično djelo ili da se protiv istog lica ne vodi krivični postupak, osim za krivična djela protiv sigurnosti javnog prometa učinjena iz nehata, koja za posljedicu imaju tjelesnu povredu ili materijalnu štetu;
 - e) da u posljednje dvije godine od dana pravosnažnosti rješenja o prekršaju, odnosno konačnosti prekršajnog naloga nije kažnjavao za prekršaj protiv javnog reda i mira koji se odnosi na fizički napad, učestvovanje u tuči, fizičko zlostavljanje, izazivanje tuče ili za prekršaj propisan ovim zakonom za koji je izrečena zaštitna mjera oduzimanja oružja, bitnih dijelova i municije izuzev izrečene zaštitne mjere oduzimanja oružja, bitnih dijelova i municije kategorije C iz člana 7. tačke c) ovog Zakona, ili za prekršaj zbog nasilja u porodici ili ako mu je u skladu sa Zakonom o zaštiti od nasilja u porodici („Službene novine Federacije BiH“, broj: 20/13 i 75/21) izrečena zaštitna mjera ili za prekršaj sa elementima fizičkog nasilja u skladu sa drugim propisima, kao i da se protiv tog lica ne vodi postupak za takve prekršaje;
 - f) da ne postoje okolnosti koje negativno utiču na javni red i mir, odnosno interese sigurnosti, kao i da ne postoje druge okolnosti koje ukazuju da bi oružje moglo biti zloupotrijebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i ekscresno ponašanje i drugi poremećaji u ponašanju, kriminalističko - obavještajni razlozi i razlozi koji ukazuju na povezanost sa licima iz kriminalističko - obavještajne evidencije i slično.
- (3) Posebni uslovi za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu su:
- a) da je zdravstveno sposoban za držanje, posjedovanje i nošenje oružja;
 - b) da raspolaže tehničkim znanjem za pravilno rukovanje oružjem i da poznaje propise koji se odnose na držanje, čuvanje i nošenje oružja;
 - c) da ima uslove za siguran smještaj i čuvanje oružja.
- (4) Izuzetno od stava (2) tačka b) ovog člana, odobrenje za nabavljanje i posjedovanje vatrenog oružja, koje ne uključuje kupnju i posjedovanje može se izdati i licima sa navršених 18 godina koja po posebnim propisima obavljaju poslove policijskog službenika, službenika sudske policije, službenika straže kazneno - popravnih ustanova, službenika obavještajno -sigurnosne agencije Bosne i Hercegovine, profesionalna vojna lica, pripadnici agencija i unutrašnjih službi za zaštitu ljudi i imovine, čuvari šuma, lovišta i ribolovišta, kao i članovima sportske streljačke organizacije koji se aktivno takmiče u streljaštvu ili licima sa položenim lovačkim ispitom.
- (5) Opravdanost zahtjeva za izdavanje odobrenja za nabavljanje i posjedovanje oružja utvrđuje komisija u skladu sa pravilnikom iz člana 9. stav (7) ovog zakona.

Član 11.

(Utvrdjivanje uslova za izdavanje odobrenja za nabavljanje i posjedovanje vatrenog oružja i bitnih dijelova kategorije B fizičkom licu)

- (1) Uslov iz člana 10. stav (2) tačka a) i b) utvrđuje se na osnovu lične karte koju u ovjerenoj fotokopiji dostavlja podnosilac zahtjeva zajedno sa obavijesti o prebivalištu - boravištu sa ličnim podacima (PBA - 3 obrazac).
- (2) Fizičko lice ima opravdan razlog za nabavljanje i posjedovanje vatrenog oružja ako vatreno oružje nabavlja u svrhu lične sigurnosti, radi zaštite imovine, bavljenja lovom ili sportom.
- (3) Fizičko lice ima opravdani razlog za nabavljanje i posjedovanje vatrenog oružja u svrhu lične sigurnosti i radi zaštite imovine, ukoliko učini vjerovatnim da bi mu mogla biti ugrožena lična sigurnost i imovina.

(4) Fizičko lice ima opravdan razlog za nabavljanje i posjedovanje lovačkog oružja ukoliko je član lovačke organizacije i ukoliko ima položen lovački ispit, što dokazuje uvjerenjem o članstvu u lovačkom društvu, članskom knjižicom i uvjerenjem o položenom lovačkom ispitu.

(5) Fizičko lice ima opravdan razlog za nabavljanje i posjedovanje sportskog oružja ukoliko je član sportske streljačke organizacije i aktivno se bavi sportskim streljaštvom, što dokazuje uvjerenjem sportske streljačke organizacije čiji je član i članskom knjižicom.

(6) Uslovi iz člana 10. stav (2) tačke d) ovog zakona utvrđuju se se na osnovu uvjerenja o neosuđivanosti izdatog od organa nadležnog za vođenje kaznenih evidencija, odnosno uvjerenja o nevođenju krivičnog postupka izdatog od nadležnog suda, koja dostavlja podnosilac zahtjev i koja ne smiju biti starija od 30 dana.

(7) Uslov iz člana 10. stav (2) tačka e) ovoga zakona utvrđuje se provjerom u prekršajnoj evidenciji nadležne policijske stanice.

(8) Uslov iz člana 10. stav (2) tačka c) i f) ovog zakona utvrđuje se terenskom provjerom policijskog službenika nadležne policijske stanice.

(9) Lovačke i sportske streljačke organizacije su obavezne da u roku od osam dana od dana prestanka članstva svoga člana o navedenom dostave obavijest nadležnoj policijskoj upravi.

Član 12.

(Dostavljanje dokaza o ispunjavanju posebnih uslova)

(1) Uslov iz člana 10. stav (3) tačka c) ovoga zakona, utvrđuje policijski službenik na adresi podnosioca zahtjeva.

(2) Podnosilac zahtjeva koji ispunjava opće uslove iz člana 10. stav (2) ovog zakona, će u roku od 60 dana od dana obaviještenja o ispunjavanju općih uslova dostaviti dokaze o ispunjavanju posebnih uslova iz člana 10. stav (3) tačka a) i b) ovog zakona.

Član 13.

(Utvrdjivanje zdravstvene sposobnosti)

(1) Uslov iz člana 10. stav (3) tačka a) ovoga zakona podnosilac zahtjeva dokazuje uvjerenjem o zdravstvenoj sposobnosti za držanje, odnosno za držanje i nošenje oružja, a zaposlena lica u institucijama iz člana 4. stav (3) ovog zakona koja nabavljaju vatreno oružje u svoje lične svrhe, ovaj uslov dokazuju ispravom o zaposlenju nadležne institucije.

(2) Uvjerenje iz stava (1) ovog člana izdaje nadležna zdravstvena ustanova koja ispunjava uslove iz stava (4) ovog člana s rokom važenja od šest mjeseci od dana izdavanja.

(3) Isprava o zaposlenju iz stava (1) ovog člana ne može biti starija od šest mjeseci od dana izdavanja.

(4) Uslove koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja, način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom pregledu, utvrdiće se pravilnikom, koji donosi ministar zdravstva Tuzlanskog kantona uz saglasnost ministra.

Član 14.

(Promjene zdravstvene sposobnosti)

Nadležna zdravstvena ustanova koja ima saznanja o promjeni zdravstvenog stanja vlasnika oružja, a koje može uticati na njegovu sposobnost za držanje i nošenje oružja, dužna je odmah po saznanju za takvu promjenu obavijestiti policijsku stanicu prema mjestu prebivališta vlasnika oružja.

Član 15.

(Utvrdjivanje tehničkog znanja za pravilno rukovanje oružjem i za poznavanje propisa koji se odnose na držanje, čuvanje i nošenje oružja)

(1) Ispunjavanje uslova iz člana 10. stav (3) tačka b) ovog zakona za oružje kategorije B podnosilac zahtjeva dokazuje:

- a) potvrdom o položenom ispitu o osposobljenosti za pravilno držanje, nošenje i rukovanje oružjem uprave policije ili
- b) potvrdom o položenom ispitu o osposobljenosti za pravilno držanje, nošenje i rukovanje oružjem koju izdaje sportska streljačka, odnosno druga organizacija ili ustanova koja posjeduje odobrenje za provođenje obuke u rukovanju oružjem.

(2) Izuzetno od stava (1) ovog člana, lica koja posjeduju registrovano vatreno oružje u skladu sa ranije važećim propisima i lica koja obavljaju ili su obavljali poslove policijskog službenika, službenika sudske policije, službenika straže kazneno - popravnih ustanova, službenika obavještajno - sigurnosne agencije Bosne i Hercegovine, pripadnici agencija i unutrašnjih službi za zaštitu ljudi i imovine, profesionalna vojna lica, rezervne vojne starješine, oslobođena su obuke za pravilno rukovanje oružjem i obuke o poznavanju propisa koji se odnose na držanje, čuvanje i nošenje oružja, kao i druga lica koja su kroz školovanje i druge vidove obuke osposobljena za pravilno rukovanje oružjem i poznaju propise koji se odnose na držanje, čuvanje i nošenje oružja, što dokazuju odgovarajućom ispravom izdatom u skladu sa zakonom.

(3) Program obuke i način osposobljavanja za pravilno rukovanje oružjem i poznavanje propisa u vezi držanja, čuvanja i nošenja oružja, imenovanje i način rada komisije uređuje se pravilnikom, koji donosi ministar na prijedlog direktora Uprave policije.

Član 16.

(Odobrenje za provođenje obuke u rukovanju oružjem)

(1) Odobrenje za provođenje obuke sportskim streljačkim organizacijama ili ustanovama u rukovanju oružjem nadležna policijska uprava će izdati ako:

- a) je sportska streljačka organizacija ili ustanova upisana u registar kod nadležnog organa.
- b) su ispunjeni prostorni i tehnički uslovi za čuvanje, smještaj i upotrebu oružja i municije, kojima se osigurava da oružje i municija ne dođe u posjed neovlašćenih lica i ne ugrozi sigurnost ljudi i objekta;
- c) ako odgovorno lice organizacije ili ustanove za provođenje obuke u rukovanju oružjem ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona, a ako će provoditi obuku u rukovanju oružjem mora da posjeduje sertifikat obrazovne ili stručne ustanove ili druge odgovarajuće organizacije ili institucije za certificiranog instruktora za provođenje obuke u rukovanju oružjem;
- d) ako zaposleno lice koje će provoditi obuku u rukovanju oružjem u organizaciji ili ustanovi za provođenje obuke u rukovanju oružjem ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona i ako posjeduje sertifikat obrazovne ili stručne ustanove ili druge odgovarajuće organizacije ili institucije za certificiranog instruktora za provođenje obuke u rukovanju oružjem.

(2) Zahtjev za izdavanje odobrenja za provođenje obuke u rukovanju oružjem će se odbiti ako podnosilac zahtjeva ne ispunjava uslove iz stava (1) ovog člana.

(3) Odobrenje za provođenje obuke u rukovanju oružjem nadležna policijska uprava će ukinuti i zabraniti dalje obavljanje djelatnosti ako organizacija ili ustanova za provođenje obuke u rukovanju oružjem prestane ispunjavati uslove iz stava (1) ovog člana.

(4) Postojanje uslova iz stava (1) ovog člana utvrđuje komisija u skladu sa pravilnikom iz člana 9. stav (6), (7) i (8) ovog zakona.

Član 17.

(Izdavanje odobrenja za nabavljanje i posjedovanje vatrenog oružja pravnom licu radi naoružanja čuvara, lovočuvara i čuvara šuma)

(1) Odobrenje za nabavljanje i posjedovanje vatrenog oružja kategorije B u cilju naoružanja čuvara, lovočuvara, čuvara šuma i drugih radnika koji neposredno vrše poslove zaštite i čuvanja, može se izdati:

- a) pravnom licu koje obavlja poslove zaštite ljudi i imovine putem osnivanja posebnih agencija za te poslove ili organiziranjem unutrašnje službe zaštite u pravnom licu u skladu sa Zakonom o agencijama i unutrašnjim službama za zaštitu ljudi i imovine;
- b) korisniku lovišta koji ima osnovanu lovočuvarsku službu radi obavljanja poslova zaštite i čuvanja lovišta u skladu sa Zakonom o lovstvu;
- c) pravnom licu koje obavlja poslove zaštite i čuvanja šuma i šumskih zemljišta putem osnivanja čuvarske službe u skladu sa Zakonom o šumama;
- d) drugim pravnim licima kojima je prema posebnim propisima potrebno oružje radi zaštite i čuvanja, pod uslovom da imaju osnovanu čuvarsku službu.

(2) Odobrenje za nabavljanje i posjedovanje oružja pravnim licima iz stava (1) ovog člana nadležna policijska uprava će izdati ako:

- a) odgovorno lice u pravnom licu ispunjava opće i posebne uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;
- b) zaposleno lice koje će u pravnom licu obavljati poslove zaštite i čuvanja ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;
- c) ako ima prostor za siguran smještaj i čuvanje oružja i municije.

(3) Pravno lice iz stava (1) tačka a) ovog člana može nabaviti i posjedovati oružje kategorije B čiji je broj propisan Zakonom o agencijama i unutrašnjim službama za zaštitu ljudi i imovine.

(4) Pravna lica iz stava (1) tačka b), c) i d) ovog člana mogu nabaviti i posjedovati vatreno oružje kategorije B čiji broj zavisi od potrebe i broja zaposlenih lica koja imaju potrebu za korištenje oružja, što se utvrđuje pravilnikom, koji donosi ministar na prijedlog direktora Uprave policije.

(5) Pravnom licu iz stava (1) tačka a) ovog člana, nadležna policijska uprava će izdati odobrenje za nabavljanje i posjedovanje oružja u skladu sa Zakonom o agencijama i unutrašnjim službama za zaštitu ljudi i imovine i podzakonskim propisima donesenim na osnovu tog zakona.

Član 18.

(Uvjerenje o ispunjavanju uslova za neposredno rukovanje oružjem i municijom)

(1) Uvjerenje o ispunjavanju uslova za neposredno rukovanje oružjem i municijom će se radi obavljanja djelatnosti izdati fizičkom, odnosno odgovornom licu u pravnom licu ili fizičkom licu koje obavlja poslove zaštite i čuvanja, kao i drugom fizičkom licu koje neposredno rukuje sa oružjem i municijom, ako su ispunjeni uslovi iz člana 10. stav (2) tačka a), b), d), e) i f) i stava (3) tačka a) i b) ovog zakona.

(2) Postojanje uslova iz stava (1) ovog člana utvrđuje komisija u skladu sa pravilnikom iz člana 9. stav (7) ovog zakona.

(3) Zahtjev za izdavanje uvjerenja iz stava (1) ovog člana će se odbiti kada se u postupku utvrdi da podnosilac zahtjeva ne ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona.

Član 19.

(Odobrenje za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti)

(1) Odobrenje za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti, nadležna policijska uprava će izdati muzeju, kao i pravnom i fizičkom licu koji nabavljaju,

čuvaju, istražuju i izlažu vatreno oružje, bitne dijelove ili municiju u historijske, kulturne, znanstvene, tehničke i obrazovne svrhe, te u svrhe očuvanja nasljeđa ili rekreativne svrhe (muzejski materijal) pod uslovom da:

a) posjeduje rješenje Ministarstva za kulturu sport i mlade TK kojim je utvrđeno da su ispunjeni uslovi za obavljanje muzejske djelatnosti (muzej, muzejska zbirka, muzejska izložba ili galerija) u pogledu odgovarajućeg muzejskog materijala, prostorija i opreme za obavljanje muzejske djelatnosti i da ima potreban broj stručnih muzejskih radnika u skladu sa Zakonom o muzejskoj djelatnosti ("Službene novine Tuzlanskog kantona", broj: 9/24);

b) fizičko lice, odnosno odgovorno lice u pravnom licu iz stava (1) ovog člana ispunjava opće i posebne uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;

c) zaposleno lice koje neposredno rukuje sa oružjem ili municijom ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;

d) ima prostor za siguran smještaj i čuvanje oružja i municije.

(2) Pravna i fizička lica iz stava (1) ovog člana mogu nabaviti i posjedovati oružje kategorije B i C.

(3) Izuzetno, pravnim i fizičkim licima iz stava (1) ovog člana može se odobriti nabavljanje i posjedovanje oružja kategorije A pod uslovom da se drže na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.

(4) Pravno lice iz stava (1) ovog člana može nabaviti i posjedovati oružje, bitne dijelove i municiju čiji broj zavisi od potrebe i broja zaposlenih što se utvrđuje pravilnikom iz člana 17. stav (4) ovog zakona.

Član 20.

(Odobrenje za nabavljanje i posjedovanje vatrenog oružja pravnog lica)

(1) Odobrenje za nabavljanje i posjedovanje vatrenog oružja izdat će se pravnom licu koje je registrovano kod nadležnog organa za obavljanje djelatnosti: lovačke ili sportske streljačke, odnosno druge organizacije ili ustanove koja posjeduje odobrenje za provođenje obuke u rukovanju vatrenim oružjem, naučnog istraživanja za koje je potrebno oružje, snimanja filmskih i prikazivanja pozorišnih predstava, te za potrebe aerodroma radi odstrela, plašenja i rastjerivanja ptica i divljači i sl.

(2) Odobrenje za nabavljanje vatrenog oružja pravnim licima iz stava (1) ovog člana nadležna policijska uprava će izdati ako:

a) ako odgovorno lice u pravnom licu ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;

b) ako zaposleno lice koje neposredno rukuje sa oružjem ili municijom ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona;

c) ako ima prostor za siguran smještaj i čuvanje oružja.

(3) Pravno lice iz stava (1) ovog člana može nabaviti i posjedovati oružje, bitne dijelove i municiju čiji broj zavisi od potrebe i broja zaposlenih što se utvrđuje pravilnikom iz člana 17. stav (4) ovog zakona.

Član 21.

(Rješavanje o zahtjevu pravnog lica)

(1) Ispunjavanje uslova iz člana 17. stav (2) tačka a) i b), člana 19. stav (1) tačka a), b) i c) i člana 20. stav (1) i stav (2) tačka a) i b) ovog zakona utvrđuje komisija u skladu sa pravilnikom iz člana 9. stav (7) ovog zakona.

(2) Prostorni i tehnički uslovi smještaja i čuvanja oružja i municije iz člana 17. stav (2) tačka c), člana 19. stav (1) tačka d) i člana 20. stav (2) tačka c) ovog zakona utvrđuju se u skladu sa pravilnikom iz člana 9. stav (8) ovog zakona.

(3) O izdavanju odobrenja iz člana 17., 19. i 20. ovog zakona odlučuje nadležna policijska uprava prema mjestu sjedišta pravnog lica, odnosno prema mjestu sjedišta podružnice.

Član 22.
(Odobrenje za nabavljanje i posjedovanje vatrenog oružja i bitnih dijelova kategorije B)

- (1) Odobrenje za nabavljanje i posjedovanje vatrenog oružja i bitnih dijelova kategorije B fizičkim i pravnim licima iz člana 17., 19. i 20. ovoga zakona izdaje se u formi rješenja sa rokom važenja od šest mjeseci od dana dostavljanja.
- (2) Odobrenje za nabavljanje i posjedovanje vatrenog oružja i bitnih dijelova kategorije B koje nije iskorišteno u roku iz stava (1) ovog člana mora se vratiti nadležnoj policijskoj upravi u roku od osam dana od dana isteka roka.
- (3) Odobrenje iz stava (1) ovog člana će se ukinuti ako fizičko lice prestane ispunjavati uslove iz člana 10. ovog zakona, odnosno ako pravno lice prestane ispunjavati uslove iz člana 17., 19. i 20. ovog zakona.
- (4) Rok važenja odobrenja iz stava (1) i obaveza iz stava (2) ovog člana obavezno se navode u rješenju o izdavanju odobrenja.

Član 23.
(Odbijanje zahtjeva za nabavljanje i posjedovanje vatrenog oružja i bitnih dijelova kategorije B)

Zahtjev za izdavanje odobrenja za nabavljanje i posjedovanje vatrenog oružja i bitnih dijelova kategorije B će se odbiti rješenjem ako podnosilac zahtjeva ne ispunjava uslove iz člana 10., odnosno iz člana 17., 19. i 20. ovoga zakona.

Član 24.
(Registracija vatrenog oružja i bitnih dijelova)

- (1) Fizičko lice koje je nabavilo vatreno oružje i bitne dijelove na osnovu odobrenja za nabavljanje i posjedovanje, dužno je u roku od osam dana od dana nabavljanja nadležnoj policijskoj upravi podnijeti zahtjev za registraciju vatrenog oružja i bitnih dijelova radi izdavanje oružnog lista.
- (2) Pravno lice koje je nabavilo vatreno oružje i bitne dijelove na osnovu odobrenja za nabavljanje i posjedovanje, dužno je u roku od osam dana od dana nabavljanja nadležnoj policijskoj upravi podnijeti zahtjev za izdavanje odobrenja za držanje vatrenog oružja i bitnih dijelova.

Član 25.
(Izdavanje isprava o oružju)

- (1) Oružni list i odobrenje za držanje vatrenog oružja izdaje nadležna policijska uprava sa rokom važenja od pet godina.
- (2) Potvrda o prijavi oružja se izdaje na neodređeno vrijeme, a u slučaju promjene vlasništva nad oružjem vlasnik je dužan potvrdu vratiti organu koji je potvrdu izdao.
- (3) Vlasnik oružja za koje su izdate isprave o oružju iz stava (1) ovog člana dužan je prije isteka roka važenja isprava o oružju podnijeti zahtjev za produženje važenja istih. Uz zahtjev je dužan priložiti dokaz o ispravnosti oružja, uvjerenje o zdravstvenoj sposobnosti za držanje i nošenje oružja i uvjerenje o članstvu u lovačkoj ili streljačkoj organizaciji.
- (4) Nadležna policijska uprava će izvršiti zamjenu isprave o oružju ako vlasnik oružja ispunjava uslove iz člana 10., odnosno člana 17., 19. i 20. ovog zakona.
- (5) Zahtjev za zamjenu isprava o oružju će se odbiti kada se u postupku zamjene utvrdi da vlasnik oružja ne ispunjava neki od uslova iz člana 10., odnosno člana 17., 19. i 20. ovog zakona.
- (6) Ako vlasnik oružja prije datuma isteka važnosti isprave o oružju ne podnese zahtjev za zamjenu isprave o oružju, nadležna policijska stanica će istom izdati prekršajni nalog uz mogućnost da u roku od 30 dana od dana

dostavljanja istog podnese zahtjev za produženje isprave o oružju, uz predočavanja dokaza o izvršenoj uplati izrečene novčane kazne.

(7) U slučaju iz stava (5) ovog člana kao i u slučaju nepostupanja po stavu (6) ovog člana nadležna policijska uprava će oduzeti oružje, bitne dijelove, municiju i isprave o oružju i postupiti u skladu sa članom 53. ovog zakona.

(8) Izuzetno od odredbe stava (5) ovog člana nadležna policijska uprava će donijeti zaključak kojim se postupak zamjene isprava o oružju prekida ako se nakon podnošenja zahtjeva za zamjenu isprave o oružju utvrdi da se protiv vlasnika oružja vodi krivični ili prekršajni postupak.

(9) Nakon izdavanja isprava iz stava (1) ovog člana, nadležna policijska uprava može i prije isteka roka od pet godina vršiti povremene provjere da li vlasnik oružja ispunjava uslove iz člana 10., odnosno člana 17., 19. i 20. ovog zakona.

(10) Izuzetno od stava (1) ovog člana, Oružni list će se izdati sa rokom važenja kraćim od pet godina ukoliko je uvjerenjem o zdravstvenoj sposobnosti, sposobnost podnosioca zahtjeva određena za period kraći od pet godina.

Član 26.

(Odbijanje zahtjeva za izdavanje oružnog lista i odobrenja za držanje vatrenog oružja)

(1) Nadležna policijska uprava će odbiti zahtjev za izdavanje oružnog lista, odnosno odobrenja za držanje vatrenog oružja ako je podnosilac zahtjeva nabavio vatreno oružje nakon isteka roka iz člana 22. ovog zakona, kao i u slučaju kada se u postupku registracije utvrdi da je prestao ispunjavati uslove iz člana 10., odnosno člana 17., 19. i 20. ovog zakona.

(2) Nadležna policijska uprava će odbiti zahtjev za izdavanje oružnog lista, odnosno odobrenja za držanje vatrenog oružja za vatreno oružje i bitne dijelove za koje se ne može dokazati porijeklo i koje nije obilježeno žigom u skladu sa posebnim propisom.

(3) U slučaju iz stava (1) ovog člana nadležna policijska uprava će oduzeti vatreno oružje, bitne dijelove i postupiti u skladu sa članom 53. ovog zakona.

(4) U slučaju iz stava (2) ovog člana nadležna policijska uprava će oduzeti vatreno oružje i bitne dijelove, koje će se dostaviti Upravi policije radi uništenja.

Član 27.

(Nošenje vatrenog oružja)

(1) Nošenje vatrenog oružja može se odobriti fizičkom licu koje posjeduje vatreno oružje u svrhu lične sigurnosti i radi zaštite imovine na osnovu izdatog oružnog lista za držanje oružja, ako zbog opravdanih razloga, postoji potreba za nošenjem vatrenog oružja izvan stambenog prostora na kojem ima pravo vlasništva ili korištenja i ako je nakon izdavanja oružnog lista za držanje oružja proteklo šest mjeseci, u skladu sa pravilnikom iz člana 9. stav (7) ovog zakona.

(2) Zahtjev za nošenje vatrenog oružja nadležna policijska uprava će odbiti ako ocijeni da to ugrožava interese sigurnosti ili ukoliko se preduzimanjem redovnih i dodatnih mjera od strane nadležnog organa može osigurati odgovarajuća zaštita tog lica, u skladu sa pravilnikom iz člana 9. stav (7) ovog zakona.

(3) Fizičkom licu koje ispuni uslove za nošenje vatrenog oružja, nadležna policijska uprava izdat će dozvolu za nošenje vatrenog oružja u skladu sa pravilnikom iz člana 9. stav (5) ovog zakona.

Član 28.

(Važenje dozvole za nošenje vatrenog oružja)

(1) Dozvola za nošenje vatrenog oružja iz člana 27. stav (3) važi dok traju razlozi zbog kojih je izdata, a najduže do isteka roka važenja oružnog lista na osnovu kojeg je izdata.

(2) Ako se prije isteka roka važenja dozvole za nošenje vatrenog oružja utvrdi da su prestali razlozi zbog kojih je nošenje vatrenog oružja odobreno, nadležna policijska uprava donijet će rješenje kojim se nošenje vatrenog oružja zabranjuje, a dozvola za nošenje vatrenog oružja oduzima i poništava.

Član 29. **(Nabavljanje municije)**

Municija za vatreno oružje može se nabavljati samo za vrstu oružja za koje fizičko i pravno lice ima važeću ispravu o oružju, izuzev civilnih strelišta i sportskih streljačkih organizacija koji mogu nabavljati različitu municiju za svoje potrebe i potrebe obuke.

Član 30. **(Spravljanje municije)**

(1) Članovi sportskih streljačkih i lovačkih organizacija mogu spravljati municiju za svoje registrovano vatreno oružje kategorije B na osnovu odobrenja za spravljanje municije policijske uprave mjesta prebivališta člana sportske streljačke, odnosno lovačke organizacije.

(2) Spravljanje municije za registrovano vatreno oružje kategorije B ne smatra se proizvodnjom municije.

(3) Odobrenje iz stava (1) ovog člana izdat će se fizičkom licu ako:

- a) priloži dokaz da je član sportske streljačke ili lovačke organizacije;
- b) priloži dokaz da je osposobljeno za rukovanje municijom;
- c) priloži dokaz da prostorija namijenjena za spravljanje municije ispunjava prostorne i tehničke uslove za smještaj i čuvanje eksplozivnih materija, u skladu sa Zakonom o prometu eksplozivnih materija i zapaljivih tečnosti i gasova („Službeni list SR BiH“, broj: 39/89 i 36/90).

(4) Postojanje uslova iz stava (3) ovog člana utvrđuje komisija u skladu sa pravilnikom iz člana 9. stav (7) i (8) ovog zakona.

(5) Municijom iz ovog člana zabranjeno je trgovati.

(6) Za nabavljanje opreme za spravljanje municije nije potrebno odobrenje nadležne policijske uprave.

(7) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uslove iz stava (3) ovog člana.

(8) Odobrenje za spravljanje municije će se ukinuti i zabraniti spravljanje municije fizičkom licu iz stava (1) ovog člana ako prestane ispunjavati uslove iz stava (3) ovog člana.

Član 31. **(Nabavljanje eksplozivnih materija u svrhu spravljanja municije)**

(1) Fizička lica iz člana 30. stav (1) ovog zakona eksplozivne materije u svrhu spravljanja municije mogu nabavljati na osnovu odobrenja policijske uprave mjesta prebivališta ili boravišta člana sportske streljačke, odnosno lovačke organizacije.

(2) Odobrenje iz stava (1) ovog člana izdaje se sa rokom važenja od šest mjeseci od dana izdavanja i sadrži podatke o vrsti, količini i oznakama pakovanja eksplozivnih materija koje će se upotrijebiti za spravljanje municije.

(3) Odobrenje iz stava (1) ovog člana koje nije iskorišteno u roku iz stava (2) ovog člana mora se vratiti nadležnoj policijskoj upravi u roku od osam dana od dana isteka roka.

(4) Postojanje uslova za izdavanje odobrenja iz stava (1) ovog člana utvrđuje komisija u skladu sa pravilnikom iz člana 9. stav (7) ovog člana.

Član 32.
(Odobrenje za sakupljanje i držanje starog oružja)

- (1) Odobrenje za sakupljanje i držanje starog oružja nadležna policijska uprava izdaje fizičkom i pravnom licu ako:
- a) je posvećeno prikupljanju i očuvanju vatrenog oružja, bitnih dijelova ili municije u istorijske, kulturne, znanstvene, tehničke i obrazovne svrhe ili svrhe očuvanja nasljeđa;
 - b) fizičko lice, odnosno odgovorno lice u pravnom licu ispunjava uslove iz člana 10. stav (2) tačka a), b), d), e), f) i stav (3) ovog zakona.
- (2) Pod uslovima iz stava (1) ovog člana fizičkom i pravnom licu (kolekcionar) može se izdati kolekcionarska dozvola ako posjeduje više od deset komada različitog registrovanog starog oružja.
- (3) Odobrenje za sakupljanje i držanje starog oružja i kolekcionarska dozvola izdaju se sa rokom važenja od 5 godina.
- (4) Svaki komad starog oružja vlasnik je obavezan registrovati kod nadležne policijske uprave, koja u tu svrhu izdaje oružni list za držanje starog oružja.
- (5) Oružje iz stava (1) i (2) ovog člana ne smije se nositi niti upotrebljavati, niti se za njega smije nabavljati, držati ili spravljati municija.
- (6) Oružje iz stava (1) i (2) ovog člana smije se prodati samo fizičkom i pravnom licu, kojem je izdata isprava iz stava (1) i (2) ovog člana, a prodavac oružja je dužan izvršiti objavu oružja kod nadležne policijske uprave u roku od osam dana od dana prodaje.
- (7) Lice kome je izdato odobrenje za sakupljanje starog oružja, odnosno kolekcionarska dozvola može, pored starog oružja, sakupljati i hladno oružje, automatsko i poluautomatsko oružje i bitne dijelove kategorije A koje više nije u naoružanju oružanih snaga ili policije, a trajno je onesposobljeno za upotrebu, pod uslovom da se drže na mjestu koje je dovoljno udaljeno od naseljenog mjesta, javnih puteva, željezničkih pruga, dalekovoda visokog napona i drugih važnih objekata ili su od tih objekata odvojeni zaštitnim grudobranom ili zidom koji pruža punu zaštitu od eksplozija i požara.
- (8) Opravdanost zahtjeva za izdavanje odobrenja za nabavljanje oružja utvrđuje komisija u skladu sa pravilnikom iz člana 9. stav (7) ovog zakona.
- (9) Nadležna policijska uprava će rješenjem odbiti zahtjev za izdavanje odobrenja za sakupljanje i držanje starog oružja i zahtjev za izdavanje kolekcionarske dozvole ako podnosioc zahtjeva ne ispunjava uslove iz stava (1) ovog člana.
- (10) Nadležna policijska uprava će rješenjem oduzeti staro oružje i isprave o oružju ako fizičko i pravno lice prestane ispunjavati uslove iz stava (1) ovog člana i postupiti u skladu s članom 53. ovog zakona.

Član 33.
(Oružje sa obavezom prijavljivanja)

- (1) Fizičko i pravno lice može bez odobrenja nabavljati i posjedovati oružje kategorije C.
- (2) Lice iz stava (1) ovog člana koje nabavi oružje kategorije C, dužno je prijaviti oružje nadležnoj policijskoj upravi u roku od osam dana od dana nabavljanja i uz prijavu dostaviti dokaz o porijeklu oružja.
- (3) Za prijavljeno oružje kategorije C nadležna policijska uprava izdaje potvrdu o prijavi.
- (4) Trgovac oružjem ili prodavac dužan je prijaviti prodaju oružja kategorije C nadležnoj policijskoj upravi u roku od osam dana od dana prodaje, a prijava o prodatom oružju mora sadržavati podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), datum prodaje, podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka) i podatke o bitnim dijelovima (serijski broj ili jedinstvenu oznaku).
- (5) Oružje kategorije C ne smije se prodati fizičkom licu koje nije navršilo 21 godinu života.

Član 34.
(Dobrovoljna predaja oružja kategorije B i C)

- (1) Ako vlasnik registrovanog oružja ne želi da drži i posjeduje oružje, može nadležnoj policijskoj upravi dobrovoljno predati oružje, isprave o oružju i bitne dijelove kategorije B i C.
- (2) Za oružje iz stava (1) ovog člana vlasniku se izdaje potvrda o dobrovoljnoj predaji oružja i bitnih dijelova.
- (3) O dobrovoljnoj predaji oružja i bitnih dijelova nadležna policijska uprava sačinjava zapisnik koji potpisuje vlasnik oružja i ovlašteno lice koje je sačinilo zapisnik.
- (4) Izjava o dobrovoljnoj predaji ne može se opozvati.
- (5) Oružje i bitni dijelovi iz stava (1) ovog člana će se dostaviti Upravi policije radi stavljanja na raspolaganje ili uništenja.

POGLAVLJE III. POSTUPANJE SA ORUŽJEM I MUNICIJOM

Član 35.
(Prenos vlasništva nad vatrenim oružjem i bitnim dijelovima)

- (1) Vlasnik vatrenog oružja može prodati ili pokloniti vatreno oružje i bitne dijelove samo fizičkom ili pravnom licu koje ima odobrenje za nabavljanje i posjedovanje te vrste oružja ili odobrenje za nabavljanje oružja, bitnih dijelova i municije radi prodaje.
- (2) Vlasnik vatrenog oružja koji je prenio pravo vlasništva na lice iz stava (1) ovog člana dužan je u roku od osam dana od dana zaključivanja ugovora o prodaji ili poklonu vatrenog oružja, odjaviti oružje u nadležnoj policijskoj upravi i izvršiti predaju isprava o oružju.
- (3) Zamjena vatrenog oružja i bitnih dijelova između vlasnika može se izvršiti samo ako oružni listovi glase na istu vrstu vatrenog oružja.
- (4) Lice koje zamijeni vatreno oružje i bitne dijelove dužno je u roku od osam dana od dana zaključivanja ugovora o zamjeni vatrenog oružja i bitnih dijelova obavijestiti nadležnu policijsku upravu i podnijeti zahtjev za registraciju oružja i izdavanje isprave o oružju.

Član 36.
(Postupanje s oružjem i municijom)

- (1) Sa oružjem i municijom mora se postupati s naročitom pažnjom.
- (2) Naročita pažnja u postupanju s oružjem i municijom podrazumijeva propisno čuvanje, pravilno, stručno i pažljivo rukovanje, nošenje, prenošenje i držanje u ispravnom stanju.

Član 37.
(Zabrana nošenja oružja)

- (1) Oružje se ne smije držati i nositi bez odgovarajuće isprave o oružju i isprave o identitetu vlasnika oružja.
- (2) Vlasnik oružja koji ima pravo nošenja oružja dužan je nositi oružje na način kojim se ne ugrožava lična sigurnost i sigurnost drugih lica.
- (3) Vlasnik oružja kojem je izdat oružni list za držanje oružja smije prenositi oružje i municiju samo radi popravljavanja, modifikacije ili prepravljavanja, onesposobljavanja ili korištenja na strelištu pod uslovom da je oružje nenapunjeno i u rastavljenom stanju tako da jedan ili više dijelova oružja budu odvojeni od njega, a oružje čije rastavljanje nije moguće mora biti na drugi način onesposobljeno za trenutnu upotrebu (nošenje u futroli, bravica na obaraču i sl.) i pod uslovom da je pripadajuća municija fizički odvojena od oružja, u odgovarajućim navlakama ili kovčezima.

- (4) Van lovišta, odnosno strelišta vatreno ili vazdušno oružje ne smije biti napunjeno i mora se u skladu sa propisima koji regulišu navedenu oblast držati, odnosno nositi u odgovarajućim futrolama i kovčezima.
- (5) Zabranjeno je nošenje oružja na javnim, vjerskim i sportskim okupljanjima, osim u svrhu sportskog streljačkog takmičenja, te u odgojno-obrazovnim ustanovama i dvorištima takvih ustanova, zdravstvenim i javnim ustanovama i javnim preduzećima, vjerskim objektima i dvorištima vjerskih objekata, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je znakom javno istaknuta zabrana nošenja oružja.
- (6) Fizičko lice ne smije nositi oružje kada je pod utjecajem alkohola, opojnih droga ili drugih omamljujućih sredstava, odnosno prilikom ispitivanja odgovarajućim sredstvima i aparatima za mjerenje alkoholiziranosti od strane ovlaštenih lica ne smije imati alkohola, opojnih droga i drugih omamljujućih sredstava u organizmu.
- (7) Oružje se ne smije nositi na javnom mjestu na način kojim se može izazvati osjećanje fizičke ugroženosti, uznemirenosti i negodovanje građana.

Član 38.

(Čuvanje oružja i municije)

- (1) Oružje i municija čuvaju se na način da nisu dostupni maloljetnom ili drugom neovlaštenom licu, zaključani i odvojeni u fiksnom/nepomičnom metalnom ormaru, sefu ili sličnom spremištu, koje se ne može otvoriti alatom uobičajene upotrebe.
- (2) Oružje i municija čuvaju se u stambenom ili drugom odgovarajućem prostoru koji se nalazi u mjestu prebivališta ili boravišta, odnosno sjedišta vlasnika oružja i municije.

Član 39.

(Dotrajalo vatreno oružje i bitni dijelovi)

- (1) Imalac oružja čije je oružje dotrajalo u tolikoj mjeri da njegova upotreba može ugroziti sigurnost ljudi, a ne postoji mogućnost da se oružje popravi ili prepravi, dužan je takvo oružje predati policijskoj upravi kod koje je registrovano oružje i podnijeti zahtjev da se briše iz evidencije o registrovanom oružju.
- (2) Oružje iz stava (1) ovog člana policijska uprava zaprima uz izjavu stranke koju daje na zapisnik da se oružje predaje bez naknade. Za predato oružje policijska uprava izdaje potvrdu o predatom oružju.
- (3) Sa zamijenjenim tehnički neispravnim bitnim dijelovima vatrenog oružja postupa se u skladu sa stavovima (1) i (2) ovog člana.
- (4) Oružje iz stava (1) ovog člana kao i dijelovi iz stava (3) ovog člana uništavaju se u skladu sa odredbama ovog zakona.

Član 40.

(Postupci s oružjem i municijom u slučaju napuštanja mjesta prebivališta ili boravišta)

- (1) Vlasnik oružja, bitnih dijelova i municije, koji napušta mjesto prebivališta ili boravišta na vrijeme duže od tri mjeseca, dužan je predati oružje, bitne dijelove i municiju na čuvanje fizičkom licu koje ima odgovarajuću ispravu o oružju za takvu vrstu oružja.
- (2) Izuzetno od stava (1) ovog člana vlasnik oružja, bitnih dijelova i municije može svoje oružje predati na čuvanje i lovačkim ili sportskim organizacijama ili trgovcu oružja.
- (3) U slučaju iz stava (1) i (2) ovog člana, vlasnik oružja dužan je da u roku od 8 dana od dana predaje oružja, bitnih dijelova i municije obavijesti nadležnu policijsku upravu kod koje je registrovano oružje.
- (4) Nadležna policijska uprava će izdati potvrdu o prijemu obavještenja iz stava (3) ovog člana.
- (5) Uslovi i način predaje oružja, bitnih dijelova i municije na čuvanje iz stava (1) i (2) ovog zakona utvrdit će se pravilnikom iz člana 9. stav (5) ovog zakona.

Član 41.
(Rukovanje i upotreba oružja)

- (1) Vlasnik oružja dužan je da pravilno i oprezno rukuje sa oružjem i da se stara da oružje bude u ispravnom stanju.
- (2) Zabranjena je upotreba oružja na javnom mjestu i drugim mjestima na kojima se upotrebom oružja ugrožava sigurnost ljudi i objekata, te narušava javni red i mir.
- (3) Lovачko i sportsko oružje se ne smije upotrebljavati izvan lovišta, odnosno strelišta ili drugih mjesta koja su određena za vježbe gađanja.
- (4) Izuzetno izvan lovišta, odnosno strelišta ili drugih mjesta koja su određena za vježbe gađanja, vazdušno oružje i luk se smiju upotrebljavati i na mjestima koja su po svom položaju ili po poduzetim mjerama takva, da se ne može ugroziti sigurnost građana.
- (5) Vlasnik oružja dužan je da na poziv nadležne policijske uprave donese oružje na ispitivanje i tehnički pregled.
- (6) Električni paralizatori i raspršivači (sprejevi) smiju se upotrebljavati samo za samoodbranu.

Član 42.
(Povjeravanje nošenja i prenošenja oružja i municije)

- (1) Pravno lice iz člana 17., 19. i 20. ovog zakona, može povjeriti nošenje oružja članu streljačke ili lovačke organizacije, odnosno fizičkom licu koje obavlja poslove zaštite ili čuvaru šuma, lovišta i ribolovišta, a koji ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona.
- (2) Član streljačke ili lovačke organizacije, odnosno fizičko lice, koje obavlja poslove zaštite, ili čuvar šuma, lovišta i ribolovišta iz stava (1) ovog člana, oružje i municiju koji su mu povjereni može nositi samo na strelištu ili terenu gdje se vrši vježba gađanja ili mjestu takmičenja u gađanju, odnosno u lovištu ili ribarskom području, objektu ili području koje obezbjeđuje ili čuva ili na trasi prevoza i prenosa imovine koju obezbjeđuje i samo za vrijeme vježbe gađanja ili obavljanja poslova zaštite i čuvanja
- (3) Fizičko lice iz stava (2) ovog člana, koje ne stanuje na području koje čuva, može prenositi oružje do svog mjesta stanovanja sa izdatom potvrdom o prenošenju oružja i municije.
- (4) Pravno lice iz stava (1) ovog člana, izdaje potvrdu o nošenju oružja i municije fizičkom licu iz stava (2) ovog člana, odnosno potvrdu o prenošenju oružja i municije fizičkom licu iz stava (3) i o tome je dužno obavijestiti nadležnu policijsku upravu kod koje je oružje registrovano u roku od 48 sati od dana izdavanja potvrde.

Član 43.
(Postupanje u slučaju prestanka potrebe za držanjem i posjedovanjem vatrenog oružja, bitnih dijelova i municije pravnih lica)

- (1) Pravno lice iz člana 17. stav (1) tačka b), c) i d) i pravno lice iz člana 19. i 20. ovog zakona kod koga je iz bilo kojih razloga prestala potreba za daljim držanjem vatrenog oružja, bitnih dijelova i municije će u roku od osam dana od dana prestanka potrebe za držanjem i posjedovanjem vatrenog oružja, bitnih dijelova i municije nadležnoj policijskoj upravi vratiti odobrenje za držanje vatrenog oružja, a vatreno oružje, bitne dijelove i municiju predati nadležnoj policijskoj stanici.
- (2) Pravno lica iz člana 17. stav (1) tačka a) ovog zakona nadležnoj policijskoj upravi dostavlja obavijest u skladu sa Pravilnikom o vatrenom oružju za obavljanje poslova fizičke zaštite ljudi i imovine ("Službene novine FBiH", broj: 92/14).
- (3) Za oružje iz stava (1) i (2) ovog člana pravnom licu se izdaje potvrda.
- (4) U slučajevima iz stava (1) i (2) ovog člana nadležna policijska uprava će postupiti u skladu sa članom 53. ovog zakona.

Član 44.

(Postupanje u slučaju nestanka ili krađe vatrenog oružja, bitnih dijelova, municije ili isprava o oružju)

- (1) Vlasnik oružja u slučaju nestanka ili krađe oružja, bitnih dijelova, municije ili isprave o oružju, dužno je prijaviti nestanak ili krađu nadležnoj policijskoj stanici odmah, a najkasnije u roku od 24 sata od saznanja za nestanak ili krađu.
- (2) Nestanak ili krađa isprave o oružju objavljuje se na internet stranici Ministarstva unutrašnjih poslova Tuzlanskog kantona (u daljem tekstu: Ministarstvo).
- (3) Ukoliko se u roku od 15 dana od dana objavljivanja na internet stranici ne pronađe isprava o oružju, nadležna policijska uprava donosi rješenje o poništenju isprave o oružju, a vlasnik oružja je dužan da po pravosnažnosti rješenja o poništenju isprave o oružju podnese zahtjev za izdavanje nove isprave o oružju.
- (4) O nestalom ili ukradenom oružju, bitnim dijelovima i ispravama o oružju nadležna policijska stanica vlasniku oružja izdaje potvrdu i raspisuje potragu.
- (5) U slučaju nestanka ili krađe oružja i bitnih dijelova, vlasnik oružja predaje ispravu o oružju nadležnoj policijskoj upravi odmah, a najkasnije u roku od osam dana od saznanja za nestanak ili krađu.

Član 45.

(Postupanje sa pronađenim oružjem, bitnim dijelovima, municijom i ispravama o oružju)

- (1) Tko nađe oružje, bitne dijelove, municiju i isprave o oružju ili sazna za skriveno oružje, bitne dijelove i municiju dužan je o tome odmah obavijestiti najbližu policijsku stanicu koja nakon zaprimanja obavijesti poduzima sve neophodne mjere i radnje iz svoje nadležnosti s ciljem pronalaska vlasnika oružja, bitnih dijelova i isprava o oružju.
- (2) Obavijest o pronađenom oružju, bitnim dijelovima, municiji i ispravama o oružju objavljuje se na internet stranici Ministarstva.
- (3) Ukoliko se vlasnik pronađenog oružja, bitnih dijelova, municije i isprava o oružju ne javi nadležnoj policijskoj upravi u roku od 30 dana od dana obavještanja o pronalasku oružja, bitnih dijelova, municije ili isprava o oružju, nadležna policijska uprava će donijeti rješenje o oduzimanju oružja, bitnih dijelova, municije ili isprava o oružju. Nakon pravosnažnosti rješenja oduzeto oružje i bitni dijelovi dostavljaju se Upravi policije radi stavljanja na raspolaganje ili uništenja.
- (4) Ukoliko se za pronađeno oružje, bitne dijelove i municiju ne utvrdi vlasnik nakon proteka jedne godine od dana pronalaska oružja, bitnih dijelova i municije, nadležna policijska uprava će donijeti rješenje o njegovom uništenju.
- (5) Rješenje o uništenju oružja, bitnih dijelova i municije iz stava (4) ovog člana će se donijeti i u slučaju pronalaska oružja i bitnih dijelova iz člana 8. ovog zakona.

Član 46.

(Promjena prebivališta, boravišta, sjedišta, ličnog imena, prezimena i naziva pravnog lica, gubitka državljanstva)

- (1) Fizičko i pravno lice kome je izdata isprava o oružju, a koje promijeni prebivalište, boravište, odnosno sjedište, dužno je u roku od 30 dana od dana nastale promjene, prijaviti oružje nadležnoj policijskoj upravi na čijem području je novo prebivalište, boravište odnosno sjedište, radi izdavanja nove isprave o oružju i upisa u odgovarajuće evidencije isprava o oružju.
- (2) Fizičko i pravno lice kome je izdata isprava o oružju, a koje promijeni lično ime ili prezime, odnosno naziv, kao i druge promjene koje se odnose na vlasnika oružja ili njegovo oružje, dužno je u roku od 30 dana od dana nastale promjene, tu promjenu prijaviti nadležnoj policijskoj upravi, radi izdavanja nove isprave o oružju i upisa u odgovarajuće evidencije isprava o oružju.

(3) Kada fizičkom licu pravosnažnom odlukom prestane državljanstvo, dužno je u roku od 30 dana od pravosnažnosti odluke predati oružje i isprave o oružju nadležnoj Policijskoj upravi, a koja u navedenom slučaju donosi rješenje o oduzimanju i deponovanju oružja zbog prestanka državljanstva.

Član 47.

(Postupak s oružjem i municijom u slučaju smrti vlasnika oružja, bitnih dijelova i municije)

(1) U slučaju smrti vlasnika oružja, bitnih dijelova i municije, punoljetni član njegove porodice, zakonski zastupnik, staratelj, fizičko lice koje je s njim živjelo u zajedničkom domaćinstvu ili fizičko lice kod kojeg se oružje, bitni dijelovi i municija u trenutku smrti nalazilo, dužno je najkasnije u roku od 30 dana od dana smrti vlasnika nadležnoj policijskoj upravi/policijskoj stanici predati na čuvanje oružje, bitne dijelove, municiju i isprave o oružju.

(2) Nadležna policijska uprava će odmah po saznanju o smrti vlasnika oružja, i prije isteka roka iz stava (1) ovog člana, poduzeti potrebne mjere i radnje na preuzimanju oružja.

(3) Nadležna policijska uprava/policijska stanica o predatom oružju i municiji iz stava (1) ovog člana izdaje potvrdu.

(4) Nadležni sud, odnosno notar će rješenje o nasljeđivanju nakon njegove pravosnažnosti dostaviti policijskoj upravi u kojoj je registrovano nasljeđeno oružje.

(5) Nasljednik oružja, bitnih dijelova i municije iz stava (1) ovog člana u roku od 60 dana odnosno nasljednik lovačkog oružja u roku od 18 mjeseci od dana pravosnažnosti rješenja o nasljeđivanju dužan je postupiti na jedan od sljedećih načina:

a) oružje, bitne dijelove i municiju prodati ili pokloniti licu koje ima odobrenje za nabavljanje i posjedovanje te vrste oružja;

b) podnijeti zahtjev za izdavanje odobrenja za nabavljanje i posjedovanje vatrenog oružja odnosno podnijeti prijavu za posjedovanje oružja kategorije C i izdavanja potvrde o prijavi oružja;

c) podnijeti prijavu za posjedovanje trofejnog oružja, pod uslovom da se nasljeđeno oružje trajno onesposobi za upotrebu;

d) dobrovoljno predati nasljeđeno oružje, bitne dijelove i municiju nadležnoj policijskoj upravi radi uništenja ili davanja na raspolaganje Upravi policije.

(6) Izuzetno od stava (5) ovog člana, nadležna policijska uprava će čuvati oružje, bitne dijelove i municiju maloljetnog nasljednika dok ne navršši 21 godinu života.

(7) Nasljednik iz stava (6) ovog člana sa navršenih 21 godinu života dužan je s oružjem i bitnim dijelovima i municijom postupiti na način propisan stavom (5) ovog člana.

(8) Prodato ili poklonjeno oružje i bitne dijelove nasljednik mora objavit u nadležnoj policijskoj upravi u roku od osam dana od dana zaključivanja ugovora o prodaji ili poklonu.

Član 48.

(Postupci s nasljeđenim oružjem, bitnim dijelovima i municijom)

(1) Nasljedniku oružja koji podnese zahtjev za registraciju nasljeđenog oružja, bitnih dijelova i municije nadležna policijska uprava izdaje odgovarajuću ispravu o oružju, ukoliko ispunjava uslove iz člana 10. ovog zakona i postupi u skladu sa članom 47. stav (5) ovog zakona.

(2) Ukoliko nasljednik ne postupi u skladu sa članom 47. stav (5) ovog zakona ili mu je odbijen zahtjev za izdavanje odobrenja za nabavljanje i posjedovanje vatrenog oružja, oružje, bitni dijelovi i municija će se oduzeti i postupiti će se u skladu sa članom 53. ovog zakona.

(3) Ukoliko se u roku od tri godine od smrti vlasnika oružja ne provede ostavinski postupak, odnosno, ako se ne proglasi nasljednik oružja, bitnih dijelova i municije iz člana 47. ovog zakona, nadležna policijska uprava će donijeti rješenje kojim se oružje, bitni dijelovi i municija dodjeljuju Upravi policije na raspolaganje.

POGLAVLJE IV. ODUZIMANJE VATRENOG ORUŽJA, BITNIH DIJELOVA, MUNICIJE I ISPRAVA O ORUŽJU

Član 49.

(Oduzimanje vatrenog oružja, bitnih dijelova, municije i isprava o oružju)

- (1) Sportskom strijelcu će se oduzeti poluautomatsko vatreno oružje sa središnjom udarnom iglom iz člana 7. stav (1) tačka a) podtačka 9) ovog zakona, ako prestane ispunjavati uslove iz člana 8. stav (2) ovog zakona.
- (2) Vatreno oružje, bitni dijelovi, municija i isprave o oružju oduzimaju se od vlasnika oružja ako prestane ispunjavati uslove iz člana 10., odnosno člana 17., 19. i 20. ovog zakona, kao i u slučaju kada se u njihovom posjedu zatekne spremnik za municiju koji se može pričvrstiti na poluautomatsko ili repetirajuće vatreno oružje sa središnjom udarnom iglom i koji može primiti više od 20 nabojia ili u slučaju dugog vatrenog oružja može primiti više od 10 nabojia.
- (3) Vatreno oružje, bitni dijelovi i municija se oduzimaju u slučaju kada se ne može dokazati porijeklo i kada oružje nije obilježeno žigom iz člana 26. stav (2) ovog zakona.
- (4) Vatreno oružje, bitni dijelovi, municija i isprave o oružju oduzimaju se od vlasnika oružja koji u roku iz člana 25. ovog zakona ne izvrši zamjenu isprave o oružju.
- (5) U slučajevima iz stava (2) ovog člana oduzima se i staro oružje.
- (6) Vatreno oružje, bitni dijelovi, municija i isprave o oružju oduzimaju se u slučaju iz člana 45., 48 i 50. ovog zakona.
- (7) Ukoliko se oružje, bitni dijelovi, municija i isprave o oružju oduzimaju zbog kriminalističko - obavještajnih razloga ili zbog razloga koji ukazuju na povezanost sa licima iz kriminalističko - obavještajne evidencije iz člana 10. stav (2) tačka f) ovog Zakona u rješenju se neće posebno obrazlagati utvrđeno činjenično stanje.
- (8) Postupak oduzimanja oružja, bitnih dijelova, municije i isprava o oružju, kao i način postupanja sa oružjem, bitnim dijelovima, municijom i ispravama o oružju nakon provedenog upravnog postupka utvrdit će se pravilnikom koji donosi ministar na prijedlog direktora Uprave policije.

Član 50.

(Vanredni zdravstveni pregled)

- (1) Fizičko lice koje je vlasnik oružja, za koje postoji opravdana sumnja da više nije zdravstveno sposobno za držanje i nošenje oružja, nadležna policijska uprava uputit će na vanredni zdravstveni pregled o čemu donosi rješenje.
- (2) Vlasnik oružja iz stava (1) ovog člana dužan je u roku 30 dana od dana prijema rješenja o upućivanju na vanredni zdravstveni pregled dostaviti nadležnoj policijskoj upravi uvjerenje o zdravstvenoj sposobnosti za držanje i nošenje oružja.
- (3) Troškove vanrednog zdravstvenog pregleda vlasnika oružja iz stava (1) ovog člana koji je proglašen zdravstveno sposobnim za držanje i nošenje oružja snosi Uprava policije. Troškove vanrednog zdravstvenog pregleda snosi lice iz stava (1) ovog člana, ukoliko se na vanrednom zdravstvenom pregledu utvrdi da nije zdravstveno sposobno za držanje i nošenje oružja.
- (4) Od vlasnika vatrenog oružja za koga je na zdravstvenom pregledu utvrđeno da je nesposoban za držanje i nošenje vatrenog oružja ili koji ne dostavi uvjerenje o zdravstvenoj sposobnosti za držanje vatrenog oružja u roku iz stava (2) ovog člana, nadležna policijska uprava će rješenjem oduzeti vatreno oružje, bitne dijelove, municiju i isprave o oružju i postupiti u skladu sa odredbama člana 53. ovog zakona.

Član 51.

(Privremeno oduzimanje oružja, bitnih dijelova, municije i isprava o oružju)

(1) Policijski službenik će od vlasnika privremeno oduzeti oružje, bitne dijelove, municiju i isprave o oružju ako postoje osnovi sumnje da:

- a) je sa oružjem, bitnim dijelovima, municijom i ispravom o oružju izvršeno krivično djelo ili prekršaj;
- b) su oružje, bitni dijelovi, municija i isprave o oružju pribavljeni krivičnim djelom ili prekršajem;
- c) su oružje, bitni dijelovi, municija i isprave o oružju nastali izvršenjem krivičnog djela ili prekršaja.

(2) Oružje, bitni dijelovi, municija i isprave o oružju će se privremeno oduzeti odmah i prije okončanja upravnog, prekršajnog ili krivičnog postupka za krivična djela i prekršaje iz člana 10. stav (2) tačka d) i e) ovog Zakona ili ako postoje okolnosti iz člana 10. stav (2) tačka f) koje ukazuju da bi oružje moglo biti zloupotrijebljeno ili ako to nalažu posebni razlozi sigurnosti i zaštite javnog reda i mira i sigurnosti građana ili se radi o poduzimanju hitnih mjera koje se ne mogu odlagati, a postojanje činjenica na kojima se zasniva rješenje je utvrđeno ili su učinjene vjerovatnim.

(3) U slučajevima iz stava (1) i (2) ovog člana, policijski službenik nadležne policijske uprave izdaje potvrdu o privremeno oduzetom oružju, bitnim dijelovima, municiji i ispravama o oružju.

Član 52.

(Čuvanje oduzetog oružja, bitnih dijelova, municije i isprava o oružju)

(1) Oduzeto oružje, bitni dijelovi, municija i isprave o oružju na osnovu člana 49. ovog zakona čuvaju se kod policijske uprave kod koje se vodi postupak.

(2) Ministar, na prijedlog direktora Uprave policije, propisat će način čuvanja oduzetog oružja, bitnih dijelova, municije i isprava o oružju iz stava (1) ovog člana, kao i način postupanja sa oduzetim oružjem, bitnim dijelovima, municijom i ispravama o oružju.

Član 53.

(Postupanje sa predatim i oduzetim oružjem, bitnim dijelovima, municijom i ispravama o oružju)

(1) Oduzimanje oružja, bitnih dijelova, municije i isprava o oružju vrši nadležna policijska uprava.

(2) Za oduzeto ili predato oružje, bitne dijelove, municiju i isprave o oružju policijska uprava izdat će potvrdu.

(3) Oružje, bitni dijelovi i municija za koje su izdate isprave o oružju, a koje je oduzeto u upravnom postupku, njihov vlasnik može prodati ili pokloniti fizičkom ili pravnom licu koje ispunjava uslove propisane ovim zakonom u roku od šest mjeseci od pravosnažnosti rješenja o oduzimanju oružja i municije.

(4) Po pravosnažnosti rješenja nadležna policijska uprava pozvat će i obavijestiti stranku da u roku od šest mjeseci od dana obavještenja nađe kupca i proda ili pokloni oduzeto oružje, bitne dijelove i municiju i istovremeno upozoriti da ako u propisanom roku ne nađe kupca, oduzeto oružje, bitni dijelovi i municija bez prava na naknadu bit će dodijeljeno Upravi policije na raspolaganje ili će biti uništeno.

(5) Oružje, bitni dijelovi i municija, oduzeti u upravnom postupku, koje ne budu prodati ili poklonjeni nakon šest mjeseci od dana prijema poziva i obavještenja iz stava (4) ovog člana bit će dodijeljeno Upravi policije na raspolaganje ili uništeno.

(6) Odredbe stavova (4) i (5) ovog člana primjenjuju se i na registrovano oružje za koje je prestala potreba držanja, a predato od strane pravnih ili fizičkih lica nadležnoj policijskoj upravi.

(7) Postupak uništenja oružja, bitnih dijelova i municije sprovodi posebna komisija koju imenuje direktor Uprave policije.

(8) Komisija iz stava (7) ovog člana o uništenju oduzetog i predatog oružja i bitnih dijelova na uništenje sačinjava zapisnik koji se ulaže u spis.

(9) Postupanje sa predatim i oduzetim oružjem, bitnim dijelovima i municijom koje je dodijeljeno Upravi policije na raspolaganje iz pravosnažno okončanih upravnih i sudskih postupaka vršit će se u skladu sa pravilnikom o načinu raspolaganja oružjem, bitnim dijelovima i municijom oduzetim u upravnom, prekršajnom i krivičnom postupku, kojeg donosi ministar na prijedlog direktora Uprave policije.

Član 54.

(Postupak sa oružjem, bitnim dijelovima i municijom oduzetim u prekršajnom ili krivičnom postupku i oružjem za koje se ne može utvrditi porijeklo)

(1) Sa oružjem, bitnim dijelovima i municijom oduzetim u pravosnažno okončanom prekršajnom ili krivičnom postupku postupaju se u skladu sa odlukom nadležnog suda.

(2) Za oružje o kojem nije odlučeno u sudskom postupku i za koje se ne može utvrditi porijeklo ili koje prije stavljanja u promet nije obilježeno žigom u skladu sa posebnim propisima nadležna policijska uprava će donijeti rješenje na osnovu kojeg se oružje uništava.

POGLAVLJE V. TRGOVAC ORUŽJEM I POSREDNIK

Član 55.

(Trgovina oružjem, bitnim dijelovima i municijom)

(1) Trgovinom oružja, bitnim dijelovima i municijom kategorija B i C mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje nadležne policijske uprave (u daljem tekstu: trgovac oružjem).

(2) Odobrenje iz stava (1) ovog člana izdat će se ako:

- a) podnosilac zahtjeva priloži dokaz o vlasništvu ili ugovor o zakupu poslovnog prostora;
- b) su ispunjeni prostorni i tehnički uslovi za smještaj i čuvanje kojima se osigurava da oružje, bitni dijelovi i municija ne dođu u posjed neovlaštenih lica i ne ugroze sigurnost ljudi i objekata;
- c) fizičko lice, odnosno odgovorno lice u pravnom licu i lice koje neposredno rukuje oružjem ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uslova iz stava (2) ovog člana utvrđuje komisija u skladu sa pravilnicima iz člana 9. stav (7) i (8) ovog zakona.

(4) Trgovina oružjem, bitnim dijelovima oružja i municijom ne može se vršiti putem interneta.

(5) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uslove iz stava (2) ovog člana.

(6) Odobrenje za trgovinu oružjem, bitnim dijelovima oružja i municijom će se ukinuti i zabraniti dalje obavljanje djelatnosti ako trgovac oružjem prestane ispunjavati uslove iz stava (2) ovog člana.

Član 56.

(Odobrenje za nabavljanje oružja, bitnih dijelova i municije radi prodaje)

(1) Trgovac oružjem, oružje, bitne dijelove i municiju može nabavljati na osnovu odobrenja za nabavljanje radi prodaje.

(2) Odobrenje iz stava (1) ovog člana izdaje se za svaku ugovorenu količinu oružja, bitnih dijelova i municije i važi šest mjeseci od dana izdavanja.

(3) Zahtjev za izdavanje odobrenja iz stava (1) ovog člana podnosi se nadležnoj policijskoj upravi prema mjestu sjedišta trgovca oružjem, odnosno prema sjedištu podnosioca zahtjeva i sadrži:

- a) naziv i adresu trgovca oružjem (kupac);
- b) naziv i adresu pravnog lica od koga se oružje nabavlja (prodavac);
- c) vrstu, količinu i kalibar oružja, bitnih dijelova i municije;

d) naziv i adresu prevoznika.

(4) Odobrenje za nabavljanje oružja, bitnih dijelova i municije iz stava (1) ovog člana neće se izdati ako zahtjev ne sadrži sve potrebne elemente iz stava (3) ovog člana i ako postoje okolnosti koje ukazuju na ugrožavanje opće sigurnosti građana.

(5) Ukoliko iz bilo kojih razloga posumnja u porijeklo ili ispravnost oružja, bitnih dijelova i municije, trgovac oružjem je dužan odbiti nabavljanje oružja, bitnih dijelova ili municije, te o navedenom odmah obavijestiti nadležnu policijsku upravu.

Član 57.

(Prodaja oružja, bitnih dijelova i municije)

(1) Trgovac oružjem može prodavati vatreno oružje i bitne dijelove kategorije B fizičkom i pravnom licu koje ima odobrenje za nabavljanje i posjedovanje vatrenog oružja kategorije B, kao i oružje i bitne dijelove kategorije C u skladu sa odredbama ovog zakona.

(2) Nakon prodaje oružja ili bitnih dijelova iz stava (1) ovog člana trgovac oružjem je dužan u roku od osam dana od dana prodaje pismeno obavijestiti nadležnu policijsku upravu o prodaji oružja ili bitnih dijelova.

(3) Obavijest iz stava (2) ovog člana sadrži: datum prodaje oružja ili bitnih dijelova, podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), naziv nadležnog organa koji je izdao odobrenje za nabavljanje i posjedovanje vatrenog oružja kategorije B, broj i datum odobrenja, serijski broj i datum izdavanja lične karte i naziv organa koji je izdao ličnu kartu kupca.

(4) Trgovac oružjem može prodavati municiju samo licima koja imaju važeću ispravu o oružju, a u roku od osam dana od dana prodaje dužan je o tome obavijestiti policijsku upravu koja je izdala važeću ispravu o oružju.

(5) Obavijest iz stava (4) ovog člana sadrži: datum prodaje municije, podatke o kupcu (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o municiji (kalibar i broj komada), podatke o ispravi o oružju (serijski broj isprave, datum izdavanja i naziv organa koji je izdao ispravu), serijski broj i datum izdavanja lične karte i naziv organa koji je izdao ličnu kartu kupca.

(6) Prilikom prodaje oružja trgovac oružja je dužan da zadrži jedan primjerak odobrenja za nabavljanje i posjedovanje oružja, a na drugi primjerak da stavi zabilješku o izvršenoj prodaji i ovjeri je štambiljem i potpisom odgovornog lica.

Član 58.

(Popravljanje, modifikacija ili prepravljavanje vatrenog oružja, bitnih dijelova i municije)

(1) Popravljanjem, modifikacijom ili prepravljavanjem vatrenog oružja, bitnih dijelova i municije mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje Uprave policije.

(2) Odobrenje iz stava (1) ovog člana izdat će se ako:

- a) podnosilac zahtjeva priloži dokaz o vlasništvu ili ugovor o zakupu poslovnog prostora;
- b) podnosilac zahtjeva priloži dokaz o položenom majstorskom ispitu za zanimanje puškar;
- c) su ispunjeni prostorni i tehnički uslovi za smještaj i čuvanje kojima se osigurava da vatreno oružje, bitni dijelovi i municija ne dođu u posjed neovlaštenih lica i ne ugroze sigurnost ljudi i objekata;
- d) fizičko lice, odnosno odgovorno lice u pravnom licu i lice koje neposredno rukuje oružjem ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uslova iz stava (2) ovog člana utvrđuje komisija u skladu sa pravilnikom iz člana 9. stav (7) i (8) ovog zakona.

- (4) Zahtjev za izdavanje odobrenja iz stava (1) ovog člana će se odbiti ako podnositelj zahtjeva ne ispunjava uslove iz stava (2) ovog člana.
- (5) Odobrenja iz stava (1) ovog člana će se ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uslove iz stava (2) ovog člana.

Član 59.

(Vatreno oružje i bitni dijelovi koji mogu biti predmet popravljivanja, modifikacije ili prepravljivanja)

- (1) Pravna i fizička lica registrirana za obavljanje djelatnosti iz člana 58. ovog zakona mogu primiti radi popravljivanja, modifikacije ili prepravljivanja samo oružje za koje je izdata važeća isprava o oružju kategorije B i važeća isprava o oružju iz člana 8. stav (8) ovog zakona.
- (2) Pravno i fizičko lice iz stava (1) ovog člana o izvršenoj popravci, modifikaciji ili prepravci vlasniku oružja izdaje potvrdu i u roku od 48 sati u pisanoj formi obaviještava nadležnu policijsku upravu, a vlasnik oružja dužan je u roku od osam dana od dana izvršenog prepravljivanja obavijestiti nadležnu policijsku upravu.
- (3) Obavijest iz stava (2) ovog člana sadrži: datum prijema oružja radi popravke i modifikacije ili prepravke, podatke o vlasniku (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o vatrenom oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), podatke o ispravi o oružju (serijski broj isprave, datum izdavanja i naziv organa koji je izdao ispravu), razlog popravke, modifikacije ili prepravke vatrene oružja, datum preuzimanja vatrene oružja, serijski broj i datum izdavanja lične karte i naziv organa koji je izdao ličnu kartu vlasnika oružja.
- (4) Nadležna policijska uprava, po prijemu prijave o izvršenoj popravci, modifikaciji ili prepravci, podatke unosi u isprave o oružju i evidencije.
- (5) Oružje i bitni dijelovi koje je primljeno radi popravke, modifikacije ili prepravke ne smije se iznositi iz prostorija određenih za rad do njegove predaje vlasniku.
- (6) Izuzetno, od stava (5) ovog člana, vatreno oružje i bitni dijelovi koji su primljeni radi popravke, modifikacije ili prepravke, smije se iznositi iz prostorija određenih za rad, prije njegove predaje vlasniku, radi funkcionalne probe.

Član 60.

(Odobrenje za posredovanje)

- (1) Pregovaranjem ili ugovaranjem transakcija za kupovinu ili prodaju vatrene oružja, bitnih dijelova ili municije, ili opskrbu njima, kao i dogovaranjem transfera vatrene oružja, bitnih dijelova ili municije mogu se baviti pravna i fizička lica koja nakon registracije za obavljanje takve djelatnosti dobiju odobrenje nadležne policijske uprave.
- (2) Odobrenje iz stava (1) ovog člana izdaje se za svako ugovoreno posredovanje oružja, bitnih dijelova ili municije i važi šest mjeseci od dana izdavanja.
- (3) Odobrenje iz stava (1) ovog člana izdat će se ako:
- a) podnositelj zahtjeva priloži rješenje o upisu u sudski registar, odnosno odobrenje za rad nadležnog općinskog/gradskog organa i ugovor o posredovanju kojim se posrednik obavezuje da drugu ugovornu stranu dovede u vezu sa nekim trećim licem radi zaključivanja ugovora;
- b) fizičko lice, odnosno odgovorno lice u pravnom licu, kao i lica zaposlena kod pravnog ili fizičkog lica iz stava (1) ovog člana, ispunjavaju uslove iz člana 10. stav (2) tačke a), b), d), e) i f) i stav (3) tačke a) i b) ovog zakona.
- (4) Postojanje uslova iz stava (3) ovog člana utvrđuje komisija u skladu sa pravilnikom iz člana 9. stav (7) i (8) ovog zakona.
- (5) Zahtjev za izdavanje odobrenja za posredovanje će se odbiti ako podnositelj zahtjeva ne ispunjava uslove iz stava (3) ovog člana ili ako se utvrdi da bi se izdavanjem ovog odobrenja ugrozila javna sigurnost.

(6) Odobrenje za posredovanje će se ukinuti ako posrednik nakon izdavanja odobrenja prestane ispunjavati uslove iz stava (3) ovog člana.

Član 61.

(Obaveze trgovca oružjem i posrednika i odgovornost ugovornih strana)

(1) Trgovci oružjem i posrednici dužni su odbiti svaku transakciju za kupovinu ili prodaju vatrenog oružja, bitnih dijelova ili municije ili opskrbu njima, kao i pregovaranje ili ugovaranje transakcija za kupovinu ili prodaju vatrenog oružja, bitnih dijelova ili municije ili opskrbu njima ili dogovaranje transfera vatrenog oružja, bitnih dijelova ili municije, ukoliko iz bilo kojih razloga posumnjaju u porijeklo ili ispravnost vatrenog oružja, bitnih dijelova i municije, zbog njezine prirode ili opsega, te su o navedenom dužni odmah obavijestiti nadležnu policijsku upravu.

(2) Odgovornost ugovornih strana utvrđuje se prema općim pravilima obligacionog prava.

POGLAVLJE VI. ONESPOSoblJAVANJE VATRENOG ORUŽJA

Član 62.

(Uslovi za onesposobljavanje vatrenog oružja)

(1) Onesposobljavanjem vatrenog oružja mogu se baviti pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje nadležne policijske uprave.

(2) Odobrenje iz stava (1) ovog člana će se izdati ako:

- a) podnosilac zahtjeva priloži dokaz o vlasništvu ili ugovor o zakupu poslovnog prostora;
- b) podnosilac zahtjeva priloži dokaz o položenom majstorskom ispitu za zanimanje puškar;
- c) su ispunjeni prostorni i tehnički uslovi za smještaj i čuvanje kojima se osigurava da oružje ne dođe u posjed neovlaštenih lica i ne ugrozi sigurnost ljudi i objekata;
- d) fizičko lice, odnosno odgovorno lice u pravnom licu i lice koje neposredno rukuje oružjem ispunjava uslove iz člana 10. stav (2) tačka a), b), d), e) i f) i stava (3) tačka a) i b) ovog zakona.

(3) Postojanje uslova iz stava (2) ovog člana utvrđuje komisija u skladu sa pravilnicima iz člana 9. stav (7) i (8) ovog zakona.

(4) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uslove iz stava (2) ovog člana.

(5) Odobrenje iz stava (1) ovog člana će se ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uslove iz stava (2) ovog člana.

Član 63.

(Vatreno oružje koje može biti predmet onesposobljavanja)

U smislu ovog zakona predmet onesposobljavanja može biti vatreno oružje:

- a) pištolji (jednostrijelni i poluautomatski);
- b) revolveri;
- c) jednostrijelno dugocijevno vatreno oružje (koje se ne puni prelamanjem);
- d) vatreno oružje koje se puni prelamanjem (npr. s olučenom (užlijebljenom), neolučenom (glatkom) cijevi, kombinacijom olučene (užlijebljene) ili neolučene (glatke) s padajućim ili okretnim blokom, kratkocijevno i dugocijevno vatreno oružje);
- e) repetirajuće dugocijevno vatreno oružje (s olučenom (užlijebljenom) ili neolučenom (glatkom) cijevi);
- f) poluautomatsko dugocijevno vatreno oružje (s olučenom (užlijebljenom) ili neolučenom (glatkom) cijevi);
- g) automatsko vatreno oružje: npr. jurišne puške, strojnice i kratke strojnice, automatski pištolji;

h) vatreno oružje koje se puni s usta cijevi uključujući oružje koje se puni prelamanjem.

Član 64.

(Provjera i potvrđivanje onesposobljavanja vatrenog oružja)

(1) Fizičko i pravno lice iz člana 62. ovog zakona dužno je da o onesposobljavanju vatrenog oružja u roku od 48 sati od dana preuzimanja onesposobljenog oružja obavijesti Upravu policije.

(2) Obavijest iz stava (1) ovog člana sadrži: datum prijema oružja radi onesposobljavanja, podatke o vlasniku oružja (ime i prezime, odnosno naziv i ID broj pravnog lica, datum i mjesto rođenja, država rođenja, jedinstveni matični broj i adresa), podatke o oružju (vrstu, marku, model, kalibar, serijski broj oružja i oznaku na njegovom kućištu ili uvodniku metaka), podatke o bitnim dijelovima (serijski broj ili jedinstvenu oznaku), podatke o ispravi o oružju (serijski broj isprave, datum izdavanja i naziv organa koji je izdao ispravu), naznaku da je oružje onesposobljeno u skladu sa tehničkim specifikacijama vatrenog oružja, datum preuzimanja oružja, serijski broj i datum izdavanja lične karte i naziv organa koji je izdao ličnu kartu vlasnika oružja, datum deaktivacije i identitet deaktivacijskog centra.

(3) Vlasnik onesposobljenog oružja, dužan je u roku od osam dana od dana preuzimanja onesposobljenog oružja podnijeti zahtjev Upravi policije radi verifikacije onesposobljenog oružja.

(4) Uprava policije vršit će provjere da li je vatreno oružje onesposobljeno u skladu s tehničkim specifikacijama za onesposobljavanje vatrenog oružja utvrđenim pravilnikom o onesposobljavanju vatrenog oružja koji donosi ministar na prijedlog direktora Uprave policije.

(5) Ako je onesposobljavanje vatrenog oružja provedena u skladu s tehničkim specifikacijama za onesposobljavanje vatrenog oružja utvrđenim u pravilniku o onesposobljavanju oružja, Uprava policije vlasniku vatrenog oružja izdaje potvrdu o onesposobljenom oružju.

(6) Potvrda iz stava (5) ovog člana sadrži: naziv pravnog ili fizičkog lica koje je provelo onesposobljavanje, datum izdavanja potvrde o onesposobljavanju, podaci o onesposobljenom vatrenom oružju i bitnim dijelovima (proizvođač, vrsta, tip, marka, serijski broj i kalibar).

(7) Potvrda iz stava (5) ovog člana čuva se trajno.

(8) Ako je onesposobljeno vatreno oružje stavljeno u promet uz njega se prilaže potvrda o onesposobljavanju.

Član 65.

(Označavanje onesposobljenog vatrenog oružja)

(1) Onesposobljeno vatreno oružje označava se zajedničkom jedinstvenom oznakom kako bi se naznačilo da je onesposobljeno u skladu s tehničkim specifikacijama utvrđenima u pravilniku o onesposobljavanju vatrenog oružja.

(2) Prilikom onesposobljavanju vatrenog oružja izvorni serijski brojevi vatrenog oružja moraju biti sačuvani.

(3) Uprava policije na sve bitne dijelove koji su prepravljani radi onesposobljavanja vatrenog oružja stavlja oznaku koja se sastoji od:

- a) oznaka deaktivacije „D“;
- b) ISO oznaka „BA“;
- c) simbol subjekta verifikacije „TK“;
- d) godina verifikacije.

(4) Oznaka iz stava (3) ovog člana mora biti jasno vidljiva i stavljena na takav način da se ne može ukloniti, te mora sadržavati podatke o fizičkom ili pravnom licu koje je provelo onesposobljavanje.

POGLAVLJE VII. CIVILNA STRELIŠTA

Član 66. (Osnivanje civilnih strelišta)

(1) Civilno strelište za obavljanje sportske djelatnosti, djelatnosti za provođenje obuke u rukovanju vatrenim oružjem ili druge djelatnosti mogu osnovati pravna lica, koja nakon upisa u sudski registar, odnosno fizička lica koja nakon registracije za obavljanje takve djelatnosti dobiju odobrenje nadležne policijske uprave.

(2) Odobrenje iz stava (1) ovog člana izdat će se ako:

a) su ispunjeni prostorni i tehnički uslovi za čuvanje, smještaj i upotrebu oružja i municije, kojima se obezbjeđuje da oružje i municija ne dođe u posjed neovlaštenih lica i ne ugrozi sigurnost ljudi i objekta;

b) ako osnivač civilnog strelišta, odgovorno lice i lice koje neposredno rukuje oružjem na civilnom strelištu ispunjava uslove iz člana 10. stav (2) tačka a), b), d), e) i f) i stava (3) tačka a) ovog zakona.

c) ako lica iz stava (2) tačke b) ovog člana posjeduju sertifikat obrazovne ili stručne ustanove ili druge odgovarajuće organizacije ili institucije za certificiranog instruktora za vatreno oružje ili za certificiranog instruktora za provođenje obuke u rukovanju vatrenim oružjem.

(3) Zahtjev za izdavanje odobrenja iz stava (1) ovog člana će se odbiti ako podnosilac zahtjeva ne ispunjava uslove iz stava (2) ovog člana.

(4) Odobrenje za osnivanje civilnih strelišta nadležna policijska uprava će ukinuti i zabraniti dalje obavljanje djelatnosti ako pravno i fizičko lice iz stava (1) ovog člana prestane ispunjavati uslove iz stava (2) ovog člana.

(5) Odredbe ovog zakona ne primjenjuju se na lovačka strelišta koja pravna lica registrovana za obavljanje djelatnosti lova u okviru lovišta upotrebljavaju za gađanje i probu lovačkog oružja svojih članova prema propisima o lovstvu.

(6) Uslove iz stava (2) ovog člana utvrđuje komisija u skladu sa pravilnikom iz člana 9. stav (7) ovog zakona.

(7) Prostorni i tehnički uslovi za čuvanje, smještaj i upotrebu oružja i municije na civilnim strelištima, broj i vrsta oružja u vlasništvu civilnog strelišta, način korištenja oružja i municije na civilnom strelištu i vođenje civilnog strelišta, uredit će se pravilnikom koji donosi ministar na prijedlog direktora Uprave policije.

Član 67. (Upotreba oružja na civilnom strelištu)

(1) Na civilnom strelištu samo fizičko lice kojem je izdata isprava o oružju može vršiti gađanje, svojim vlastitim ili oružjem u vlasništvu strelišta na kojem se vrši gađanje.

(2) Članovi sportskih streljačkih organizacija mogu na civilnom strelištu koristiti vatreno oružje i municiju koji su vlasništvo sportskih streljačkih organizacija.

(3) Fizičko lice kojem nije izdata isprava o oružju može vršiti gađanje pod nadzorom ovlaštenog lica civilnog strelišta i isključivo sa oružjem i municijom koje je vlasništvo civilnog strelišta.

(4) Ovlašteno lice civilnog strelišta će zabraniti izvođenje gađanja i pristup licima iz stava (1), (2) i (3) ovog člana, ako njihovo ponašanje ukazuje da su pod dejstvom alkohola, opojnih droga ili drugih omamljujućih sredstava ili ako njihovo psihofizičko stanje ukazuje na nesposobnost rukovanja oružjem.

Član 68. (Nabavljanje oružja za potrebe civilnog strelišta)

(1) Nabavljanje vatrenog oružja za potrebe civilnog strelišta vrši se na osnovu izdatog odobrenja za osnivanje civilnog strelišta i u skladu sa pravilnikom iz člana 66. stav (7) ovog zakona.

(2) Odobrenje iz stava (1) ovog člana izdaje policijska uprava prema mjestu sjedišta civilnog strelišta, odnosno prema mjestu sjedišta podružnice civilnog strelišta.

(3) U slučaju prestanka rada civilnog streljista ili u slučaju prestanka ispunjavanja uslova za osnivanje i rad civilnih streljista, odnosno ako osnivač civilnog streljista ili odgovorno lice prestane ispunjavati opće i posebne uslove iz člana 10. ovog zakona, nadležna policijska uprava donosi rješenje o oduzimanju oružja, municije i isprava o oružju.

POGLAVLJE VIII. MEHANIČKI TRAG VATRENOG ORUŽJA

Član 69.

(Uzimanje mehaničkog traga vatrenog oružja)

(1) Nadležna policijska uprava će u postupku registracije za vatreno oružje koje se prvi put registruje uzimati mehanički trag vatrenog oružja, ukoliko je dostavljen od strane proizvođača oružja radi unosa u evidenciju o mehaničkom tragu vatrenog oružja.

(2) Vlasnik vatrenog oružja dužan je na poziv nadležne policijske uprave donijeti vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja.

(3) U slučaju zamjene bitnih dijelova vlasnik je dužan u roku od 8 dana donijeti vatreno oružje radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja.

(4) Vlasnik oružja kojem zbog tehničke neispravnosti nije moguće uzeti mehanički trag vatrenog oružja može vatreno oružje onesposobiti ili predati nadležnoj policijskoj upravi na uništenje u skladu sa ovim zakonom.

(5) Način uzimanja, evidentiranja, pohranjivanja i čuvanja mehaničkog traga vatrenog oružja urediće se pravilnikom, koji donosi ministar na prijedlog direktora Uprave policije.

POGLAVLJE IX. NADZOR

Član 70.

(Nadzor)

(1) Nadzor nad primjenom i provođenjem ovog zakona i podzakonskih akata donesenih na osnovu ovog zakona provodi Uprava policije.

(2) Za provođenje nadzora iz stava (1) imenuje se posebna komisija.

(3) Način imenovanja, broj članova i sastav komisije za nadzor, nadležnost i način rada, kao i druga pitanja od značaja za rad komisije, propisuje se pravilnikom koji donosi ministar na prijedlog direktora Uprave policije.

Član 71.

(Ovlaštenja u vršenju neposrednog nadzora)

(1) U obavljanju nadzora komisija iz člana 70. stav (2) ovog zakona je ovlaštena da:

- a) prati i kontroliše implementaciju ovog zakona i podzakonskih akata donesenih u skladu sa ovim zakonom;
- b) predlaže izmjene ovog zakona i podzakonskih akata kada utvrdi da neke odredbe nije moguće primjenjivati zbog izmjena u zakonima ili u načelima;
- c) predlaže i poduzima inicijativu za rješavanje pitanja iz ove oblasti;
- d) prikuplja neophodne podatke, sačinjava izvještaje, informacije i podnosi ih direktoru Uprave policije;
- e) pregleda i kontroliše skladišta oružja i municije, civilna streljista i druge prostorije gdje se drži i čuva oružje i municija, obavlja trgovina, popravlanje, modifikacija ili prepravlanje, onesposobljavanje oružja, te spravljanje municije;
- f) vrši nadzor nad postupanjem sa oružjem i municijom i pregled propisanih evidencija i ostale dokumentacije u vezi s držanjem, sakupljanjem, kolekcionarstvom i čuvanjem oružja i municije, trgovinom, posredovanjem, popravljanjem, modifikacijom ili prepravljanjem i onesposobljavanjem oružja, spravljanjem municije, osposobljavanjem lica za rukovanjem oružjem i vođenjem civilnog streljista;

g) predloži privremenu zabranu obavljanja čuvarske službe, trgovine, posredovanja, popravljanja, modifikacije ili prepravljanja i onesposobljavanja oružja, spravljanja municije, osposobljavanja lica za rukovanjem oružjem, te upotrebu civilnog strelišta i naredi da se utvrđene nepravilnosti otklone u određenom roku;

h) predloži zabranu obavljanja čuvarske službe, trgovine, posredovanja, popravljanja, modifikacije ili prepravljanja i onesposobljavanja oružja, spravljanja municije, osposobljavanja lica za rukovanjem oružjem, te upotrebu civilnog strelišta ako utvrdi da je u obavljanju tih poslova učinjen teži propust u preduzimanju zaštitnih ili drugih sigurnosnih mjera ili druge teže kažnjive radnje ili ukoliko je prestao jedan od uslova pod kojima je odobrenje izdato ili ako se ne postupi po nalogu nadležnog organa;

i) predloži preduzimanje i drugih propisanih mjera.

(2) Fizička i pravna lica, kao i organizacione jedinice Uprave policije dužni su omogućiti obavljanje nadzora i dati na uvid traženu dokumentaciju, kao i pružiti potrebne podatke i obavijesti.

POGLAVLJE X. EVIDENCIJE

Član 72.

(Evidencije policijske uprave)

(1) Policijska uprava vodi evidencije o:

- a) izdatim odobrenjima za provođenje obuke u rukovanju vatrenim oružjem;
- b) izdatim odobrenjima za trgovinu oružjem bitnim dijelovima i municijom;
- c) izdatim odobrenjima za popravljanje i modifikaciju ili prepravljanje vatrenog oružja, bitnih dijelova i municije;
- d) izdatim odobrenjima za posredovanje;
- e) izdatim odobrenjima za onesposobljavanje vatrenog oružja;
- f) izdatim potvrdama o onesposobljenom vatrenom oružju;
- g) izdatim odobrenjima za osnivanje civilnog strelišta;
- h) izdatim odobrenjima za nabavljanje i posjedovanje vatrenog oružja i bitnih dijelova fizičkom licu;
- i) izdatim odobrenjima za nabavljanje i posjedovanje vatrenog oružja pravnom licu radi naoružanja čuvara;
- j) izdatim uvjerenjima o ispunjavanju uslovima za neposredno rukovanje oružjem i municijom;
- k) izdatim odobrenjima za nabavljanje i posjedovanje vatrenog oružja, bitnih dijelova i municije radi obavljanja muzejske djelatnosti;
- l) izdatim odobrenjima za nabavljanje i posjedovanje vatrenog oružja za potrebe lovačke ili sportske streljačke organizacije ili ustanove koja posjeduje odobrenje za provođenje obuke u rukovanju vatrenim oružjem, naučnog istraživanja za koje je potrebno oružje, snimanja filmskih i prikazivanja pozorišnih predstava, te za potrebe aerodroma radi odstrela, plašenja i rastjerivanja ptica i divljači;
- m) izdatim odobrenjima za spravljanje municije;
- n) izdatim odobrenjima za nabavljanje eksplozivnih materija u svrhu spravljanja municije;
- o) izdatim odobrenjima za sakupljanje i držanje starog oružja i izdatim kolekcionarskim dozvolama;
- p) izdatim rješenjima o oduzimanju vatrenog oružja, bitnih dijelova, municije i isprava o oružju;
- q) izdatim rješenjima o privremenom oduzimanju vatrenog oružja, bitnih dijelova, municije i isprava o oružju;
- r) upućivanju na vanredni zdravstveni pregled vlasnika oružja;
- s) izdatim odobrenjima za nabavljanje vatrenog oružja, bitnih dijelova i municije radi prodaje;
- t) izdatim odobrenjima za nabavljanje oružja za potrebe civilnog strelišta.
- u) izdatim oružnim listovima;
- v) izdatim odobrenjima za držanje vatrenog oružja;

- w) izdatim dozvolama za nošenje vatrenog oružja;
- x) izdatim oružnim listovima za držanje starog oružja;
- y) izdatim potvrdama za prijavljeno oružje kategorije C;
- z) dobrovoljno predatom oružju kategorije B i C;
- aa) izdatim potvrdama u slučaju napuštanja mjesta prebivališta ili boravišta duže od tri mjeseca;
- bb) zaprimljenim obavještenjima o izdatim potvrdama o prenošenju oružja i municije;
- cc) izdatim potvrdama u slučaju prestanka potrebe za držanjem i posjedovanjem vatrenog oružja i municije pravnih lica;
- dd) izdatim potvrdama o nestanku ili krađi oružja, bitnih dijelova i municije ili isprava o oružju;
- ee) raspisanim potragama o nestanku ili krađi oružja, bitnih dijelova i municije ili isprava o oružju;
- ff) pronađenom oružju, bitnim dijelovima, municiji i ispravama o oružju;
- gg) izdatim potvrdama o predatom na čuvanje oružju, bitnih dijelova, municiju i isprava o oružju u slučaju smrti vlasnika oružja;
- hh) oduzetom vatrenom oružju bitnim dijelovima, municiji i ispravama o oružju;
- ii) privremeno oduzetom vatrenom oružju bitnim dijelovima, municiji i ispravama o oružju;
- jj) popravljenom, modificiranom ili prepravljenom vatrenom oružju, bitnim dijelovima i municiji;
- kk) onesposobljenom vatrenom oružju;
- ll) mehaničkom tragu vatrenog oružja;
- mm) dobrovoljno predatom vatrenom oružju, bitnim dijelovima i municiji kategorije A;
- oo) predatom vatrenom oružju po amnestiji;
- nn) uništenom vatrenom oružju kategorije B;
- pp) uništenom vatrenom oružju kategorije A.

(2) Evidencije iz ovog člana čuvaju se trajno.

(3) Obrasci, sadržaj i način vođenja evidencija iz ovog člana utvrđuju se pravilnikom, koji donosi ministar na prijedlog direktora Uprave policije.

Član 73.

(Evidencije pravnih i fizičkih lica)

(1) Pravna lica i fizička lica registrovana za obavljanje djelatnosti iz ovog zakona kao i sportske streljačke organizacije i lovačke organizacije vode evidencije o:

- a) nabavljenom oružju B i C kategorije,
- b) nabavljenoj municiji;
- c) izdatim potvrdama za nošenje i prenošenje oružja i municije;
- d) članstvu i prestanku članstva;
- e) primljenom oružju na čuvanje.

(2) Trgovac oružjem dužan je voditi evidencije o:

- a) nabavljenom oružju, bitnim dijelovima i municiji;
- b) prodatom oružju;
- c) prodatoj municiji,
- d) popravljenom, modificiranom ili prepravljenom oružju, bitnim dijelovima i municiji;
- e) oružju i municiji primljenom na čuvanje.

(3) Posrednik je dužan voditi posebnu knjigu o zaključenim ugovorima o posredovanju u vezi transakcija za kupovinu ili prodaju vatrenog oružja, bitnih dijelova ili municije, ili opskrbu njima.

(4) Pravno lice koje se bavi onesposobljavanjem vatrenog oružja i municije ili fizičko lice registrirano za obavljanje djelatnosti onesposobljavanja vatrenog oružja i municije dužno je voditi evidenciju o onesposobljenom vatrenom oružju.

(5) Pravno lice koje se bavi vođenjem civilnog strelišta ili fizičko lice registrirano za obavljanje djelatnosti vođenja civilnog strelišta dužno je voditi evidencije o:

- a) nabavljenom oružju i municiji;
- b) nabavljenoj municiji;
- c) registrovanom oružju koje je u vlasništvu civilnog strelišta;
- d) o korištenom oružju koje se upotrebljava prilikom gađanja;
- e) o utrošenoj municiji;
- f) o licima koja koriste usluge civilnog strelišta;
- g) o licima obučanim za rukovanje oružjem.

(6) Pravno i fizičko lice kojem je izdato odobrenje za sakupljanje i držanje starog oružja ili kolekcionarska dozvola dužno je voditi:

- a) evidenciju o sakupljenom starom oružju i evidenciju oružja koje drži na osnovu kolekcionarske dozvole i
- b) evidencije o sakupljenom hladnom, automatskom i poluautomatskom oružju i bitnim dijelovima kategorije A.

(7) Fizičko lice kojem je izdato odobrenje za spravljanje municije dužno je voditi evidenciju o spravljenjnoj municiji.

(8) Evidencije iz ovog člana čuvaju se trajno.

(9) Trgovci oružjem, posrednici, pravna i fizička lica koja se bave onesposobljavanjem oružja dužni su u roku od 15 dana od dana prestanka obavljanja djelatnosti evidencije iz stava (2), (3) i (4) ovog člana dostaviti policijskoj upravi.

(10) Trgovci oružjem, posrednici pravna i fizička lica koja se bave onesposobljavanjem oružja dužni su odmah prijaviti nabavljanje i prodaju, odnosno izvršeno posredovanje oružja, bitnih dijelova i municije, odnosno izvršeno onesposobljavanje vatrenog oružja u bazu podataka iz člana 74. ovog zakona.

(11) Obrasci, sadržaj i način vođenja evidencija iz ovog člana utvrđuje se pravilnikom koji donosi ministar na prijedlog direktora Uprave policije.

Član 74.

(Elektronska baza podataka)

(1) Radi praćenja i identificiranja vatrenog oružja i bitnih dijelova, te radi razmjene podataka nadležnih organa, fizičkih i pravnih lica koji vode evidencije u skladu sa odredbama ovog zakona, Uprava policije putem softverske aplikacije uspostavlja elektronsku bazu podataka za Tuzlanski kanton (u daljem tekstu: baza podataka).

(2) Baza podataka sadrži:

- (a) vrstu, marku, model, kalibar, serijski broj svakog vatrenog oružja i oznaku na njegovom kućištu ili uvodniku metaka kao jedinstvenu oznaku koja služi kao jedinstveni identifikator svakog vatrenog oružja;
- (b) serijski broj ili jedinstvenu oznaku na bitnim dijelovima, ako je drugačija od oznake na kućištu ili uvodniku metaka svakog vatrenog oružja;
- (c) imena i adrese dobavljača i lica koje nabavljaju ili posjeduju vatreno oružje, zajedno s odgovarajućim datumom ili datumima;
- (d) sva prepravljavanja ili modifikacije vatrenog oružja zbog čega se mijenja njegova kategorija ili podkategorija, uključujući njegovo ovjereno onesposobljavanje ili uništenje, zajedno s odgovarajućim datumom ili datumima.

(3) Podaci o vatrenom oružju i bitnim dijelovima, uključujući povezane lične podatke u bazi podataka čuvaju se u razdoblju od 30 godina nakon uništenja vatrenog oružja ili bitnih dijelova.

(4) Nakon proteka roka iz stava (3) ovog člana, podaci o vatrenom oružju i bitnim dijelovima, uključujući i lične podatke, brišu se iz baze podataka.

(5) Pristup bazi podataka mora biti omogućen, odnosno podaci iz baze podataka na pismeno traženje moraju se dostaviti:

- a) organima nadležnim za provođenje odredaba ovog zakona i organima nadležnim za carinske postupke u razdoblju do 10 godina nakon uništenja vatrenog oružja ili bitnih dijelova;
- b) organima nadležnim za sprečavanje, istragu, otkrivanje ili progon krivičnih djela ili izvršavanje krivičnih sankcija u razdoblju do 30 godina nakon uništenja vatrenog oružja ili bitnih dijelova.
- (6) Brisanje podataka ne utječe na slučajeve u kojima su određeni lični podaci preneseni organu nadležnom za sprečavanje, istragu, otkrivanje ili progon krivičnih djela ili izvršenje krivičnih sankcija i upotrebljavaju se samo u svrhu koja proizilazi iz navedenih nadležnosti organa i u skladu sa članom 88. ovog zakona.
- (7) Oblik, sadržaj i način vođenja baze podataka, utvrđuje se pravilnikom koji donosi ministar na prijedlog direktora Uprave policije.

POGLAVLJE XI. KAZNE NE ODREDBE

Odjeljak A. Krivično djelo

Član 75.

(Neovlašteno nabavljanje, posjedovanje, držanje, nošenje, trgovina, popravljanje, modifikacija ili prepravljanje i posredovanje oružjem, bitnim dijelovima i municijom)

(1) Kaznom zatvora od tri mjeseca do tri godine kaznit će se za krivično djelo:

- a) ko bez važeće isprave o oružju nabavi, posjeduje, drži ili nosi vatreno oružje, bitne dijelove ili municiju za oružje kategorije B (član 24. stav (1) i (2));
- b) ko prodava vatreno oružje ili posreduje u trgovini oružjem, bitnim dijelovima ili municijom kategorije B fizičkom ili pravnom licu koje nema odobrenje za nabavljanje i posjedovanje tog oružja (član 35. stav (1));
- c) ko prepravlja napravu s ležištem municije za ispaljivanje sačme, zrna ili projektila djelovanjem zapaljivog potisnog sredstva (član 8. stav (10));
- d) ko popravlja, modifikuje ili prepravlja vazdušno, gasno, airsoft i paintball naprave i reprodukcije oružja, za ispaljivanje bojeve municije (član 8. stav (11));
- e) trgovac oružjem ako nabavi oružje, bitne dijelove i municiju bez odobrenja za nabavljanje radi prodaje (Član 56. stav (1));
- f) ko drži staro oružje bez odobrenja za sakupljanje i držanje starog oružja ili ko nosi ili upotrebljava staro oružje ili nabavlja, drži ili spravlja municiju za to oružje ili prodava staro oružje licu koje nema odobrenje za sakupljanje i držanje starog oružja (član 32. stav (1), (5) i (6));
- g) ko nabavi eksplozivne materije u svrhu spravljanja municije ili ko spravlja municiju bez odobrenja (član 30. stav (1) i član 31. stav (1));
- h) ko popravlja, modifikuje ili prepravlja vatreno oružje ili bitne dijelove oružja ili ko onesposobljava oružje bez odobrenja ili popravlja, modifikuje ili prepravlja ili onesposobljava vatreno oružje ili bitne dijelove za koje nije izdata važeća isprava o oružju kategorije B ili ko onesposobljava oružje koje ne može biti predmet onesposobljavanja (član 58. stav (1) i član 59. stav (1)).
- (2) Za krivična djela iz stava (1) ovog člana obavezno se izriče i sigurnosna mjera oduzimanja oružja, bitnih dijelova, municije i isprava o oružju.

Odjeljak B. Prekršaji

Član 76.

(Novčana kazna i zaštitna mjera za prekršaje fizičkih lica)

(1) Novčanom kaznom od 1000,00 KM do 1.500,00 KM kaznit će se fizičko lice za prekršaj, ako:

- a) lice mlađe od 18 godina, nabavi, drži i nosi električni paralizator snage ispod 10.000 Volti, sprej za omamljivanje, vazdušno oružje čija je kinetička energija manja od 10,5 J ili je brzina projektila manja od 200

m/s i kalibra 4,5mm, oružje s tetivom čija je sila zatezanja tetive manja od 450 Njutna, odnosno čija je natezna težina manja od 101 libre/45 kilograma i airsoft i paintball naprave (član 5.stav(1));

b) lica mlađa od 15 godina nabave, drže ili nose sprej za omamljivanje (član 5. stav (2));

c) trener odnosno roditelj ili staratelj djeteta mlađeg od devet godina omogući djetetu korištenje oružja iz stava (1) tačka a) ovog člana na sportskim streljštima i drugim mjestima određenim i uređenim za vježbe gađanja (član 5. stav (3));

d) nabavi, posjeduje, drži i trguje hladnim oružjem kojem je osnovna namjena napad ili nanošenje ozljeda ili nosi takvo hladno oružje na javnom mjestu, osim u svrhu sportskog takmičenja (član 8. stav (3));

e) nabavi, posjeduje, drži i trguje podvodnim puškama i drugim predmetima, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu (član 8. stav (4));

f) drži ili nosi oružje kategorije C bez odgovarajuće potvrde o prijavi oružja (član 8. stav (8));

g) nabavi, drži ili nosi oružje kategorije C, a nije navršilo 21 godinu života (član 8. stav (9));

h) proda oružje kategorije C fizičkom licu koje nije navršilo 21 godinu života (član 33. stav (5));

i) drži i nosi oružje bez odgovarajuće isprave o oružju i isprave o identitetu vlasnika oružja (član 37. stav (1));

j) nosi oružje na javnim, vjerskim i sportskim okupljanjima u školama i školskim dvorištima, zdravstvenim i javnim ustanovama i javnim preduzećima, vjerskim objektima i dvorištima vjerskih objekata, ugostiteljskim objektima i prostorima koji se koriste za pružanje ugostiteljskih usluga, kao i na drugim mjestima ili objektima gdje je znakom javno istaknuta zabrana nošenja oružja (član 37. stav (5));

k) nosi oružje pod uticajem alkohola, opojnih droga ili drugih omamljujućih sredstava u organizmu (član 37. stav (6));

l) nosi oružje na javnom mjestu na način kojim može izazvati osjećanje fizičke ugroženosti, uznemirenosti i negodovanja građana (član 37. stav (7));

m) ne čuva oružje i municiju na način da nije dostupno maloljetnom ili drugom neovlaštenom licu, a koje nije zaključano i odvojeno u fiksom/nepomičnom metalnom ormaru, sefu ili sličnom spremištu koje se ne može otvoriti alatom uobičajne upotrebe (član 38. stav (1));

n) ne čuva oružje i municiju u stambenom ili drugom odgovarajućem prostoru koji se nalazi u mjestu prebivališta ili boravišta vlasnika oružja i municije (član 38. stav (2));

o) upotrebljava oružje na javnom mjestu i drugim mjestima čime ugrožava sigurnost ljudi i objekata, te narušava javni red i mir (član 41. stav (2));

p) upotrebljava lovačko ili sportsko oružje izvan lovišta, odnosno streljšta ili drugih mjesta koja su određena za vježbe gađanja (član 41.stav (3));

r) ne donese na ispitivanje i tehnički pregled oružje po pozivu nadležne policijske uprave (član 41. stav (5).);

s) nosi oružje i municiju kada ne obavlja vježbe gađanja ili ne obavlja poslove zaštite i čuvanja (član 42. stav (2));

t) na poziv nadležne policijske uprave ne donese vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 69. stav (2));

u) u slučaju zamjene bitnih dijelova u roku od osam dana ne donese vatreno oružje nadležnoj policijskoj upravi radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 69. stav (3));

v) zbog tehničke neispravnosti ne onesposobi ili ne preda vatreno oružje na uništenje nadležnoj policijskoj upravi (član 69. stav (4));

z) ne omogući obavljanje nadzora ili ne da na uvid traženu dokumentaciju ili ne pruži potrebne podatke i obavijesti (član 71. stav (2));

aa) ne podnese zahtjev za zamjenu isprava o oružju do isteka roka naznačenog u ispravi (član 85.);

(2) Za prekršaje iz stava (1) ovog člana obavezno se izriče i zaštitna mjera oduzimanja oružja, bitnih dijelova, municije i isprava o oružju.

Član 77.

(Novčana kazna i zaštitna mjera za prekršaje fizičkih lica)

- (1) Novčanom kaznom od 500,00 KM do 1000,00 KM kaznit će se fizičko lice za prekršaj, ako:
- a) u propisanom roku ne podnese zahtjev za registraciju vatrenog oružja i bitnih dijelova radi izdavanja oružnog lista (član 24. stav (1));
 - b) prije datuma isteka važnosti isprave o oružju ne podnese zahtjev za zamjenu isprave o oružju (člana 25. stav (6));
 - c) u propisanom roku ne vrati nadležnoj policijskoj upravi odobrenje za nabavljanje eksplozivnih materija radi spravljanja municije (član 31. stav (3));
 - d) ne prijavi nadležnoj policijskoj upravi nabavljanje oružja kategorije C u propisanom roku (član 33. stav (2));
 - e) ne prijavi nadležnoj policijskoj upravi prodaju oružja kategorije C u propisanom roku (član 33. stav (4));
 - f) nosi oružje na način kojim se ugrožava lična sigurnost ili sigurnost drugih lica (član 37. stav (2)),
 - g) prenosi oružje radi popravljivanja, modifikacije ili prepravljivanja, onesposobljavanja ili korištenja na strelištu koje je napunjeno i sastavljeno ili ako pripadajuća municija nije fizički odvojena od oružja, u odgovarajućim navlakama ili kovčezima (član 37. stav (3));
 - h) van lovišta, odnosno strelišta drži, odnosno nosi vatreno ili vazdušno oružje bez futrole ili kovčega ili koje je napunjeno (član 37. stav (4));
 - i) ne održava oružje u ispravnom stanju, nepravilno i neoprezno rukuje sa oružjem (član 41. stav (1));
 - j) vazdušno oružje i luk upotrebljava na mjestima na kojim se može ugroziti sigurnost građana (član 41. stav (4));
 - k) prenosi oružje do svog mjesta stanovanja bez izdate potvrde o prenošenju oružja i municije (član 42. stav (3.))
 - l) vlasnik oružja o izvršenoj popravci i modifikaciji ili prepravci oružja u propisanom roku ne obavijesti nadležnu policijsku upravu (član 59. stav (2)).
- (2) Za prekršaje iz stava (1) tačka: a), c) d) i j) ovog člana obavezno se izriče i zaštitna mjera oduzimanja oružja, bitnih dijelova oružja i municije i isprava o oružju.

Član 78.

(Novčana kazna i zaštitna mjera za prekršaje fizičkih lica)

- (1) Novčanom kaznom od 200,00 KM do 500,00 KM kaznit će se fizičko lice za prekršaj, ako:
- a) u propisanom roku ne vrati neiskorišteno odobrenje za nabavljanje i posjedovanje vatrenog oružja i bitnih dijelova kategorije B (član 22. stav (2));
 - b) ne izvrši odjavu oružja kod nadležne policijske uprave u roku od osam dana od dana prodaje (član 32. stav (6)).
 - c) u propisanom roku ne odjavi oružje i ne preda isprave o oružju (član 35. stav (2));
 - d) u propisanom roku ne obavijesti nadležnu policijsku upravu o izvršenoj zamjeni oružja i ne podnese zahtjev za registraciju i izdavanje isprava o oružju (član 35. stav (4));
 - e) ne preda nadležnoj policijskoj upravi vatreno oružje i bitne dijelove za koje ne postoji mogućnost popravke, modifikacije ili prepravke (član 39.);
 - f) ne preda na čuvanje oružje, bitne dijelove i municiju fizičkom licu koje posjeduje ispravu o oružju za takvu vrstu oružja kada napusti mjesto prebivališta ili boravišta duže od tri mjeseca (član 40. stav (1));
 - g) u roku od 8 dana od dana predaje oružja, bitnih dijelova i municije ne obavijesti nadležnu policijsku upravu (član 40. stav (3));
 - h) u propisanom roku ne prijavi nestanak ili krađu oružja, bitnih dijelova, municije ili isprava o oružju nadležnoj policijskoj stanici (član 44. stav (1));
 - i) u propisanom roku ne preda ispravu o oružju nadležnoj policijskoj upravi u slučaju nestanka ili krađe oružja i bitnih dijelova (član 44. stav (5));
 - j) ne obavijesti nadležnu policijsku stanicu o pronalasku oružja, bitnih dijelova, municije ili isprava o oružju (član 45. stav (1));

- k) u propisanom roku ne prijavi promjenu prebivališta ili boravišta ili promjenu ličnog imena ili prezimena ili gubitak državljanstva (član 46.);
- l) u slučaju smrti vlasnika oružja i municije u propisanom roku ne preda oružje, bitne dijelove, municiju i odgovarajuću ispravu nadležnoj policijskoj upravi (član 47. stav (1));
- m) u propisanom roku ne proda ili pokloni oružje i municiju, ne podnese zahtjev za izdavanje odobrenja za nabavljanje i posjedovanje vatrenog oružja, odnosno ne podnese prijavu za posjedovanje oružja kategorije C i izdavanja potvrde o prijavi oružja ili ne podnese prijavu za posjedovanje trofejnog oružja koje je trajno onesposobljeno za upotrebu ili ne preda oružje nadležnoj policijskoj upravi radi uništenja (član 47. stav (5));
- n) u propisanom roku ne odjavi oružje koje je prodao ili poklonio (član 47. stav (8));
- (2) Za prekršaj iz stava (1) tačke: d), f), g), j) i k) ovog člana izriče se i zaštitna mjera oduzimanja oružja, bitnih dijelova, municije i isprava o oružju.

Član 79.

(Novčana kazna i zaštitna mjera za prekršaje pravnih lica i fizičkih lica registriranih za obavljanje djelatnosti)

- (1) Novčanom kaznom od 3.000,00 KM do 5.000,00 KM kaznit će pravno lice i fizičko lice registrirano za obavljanje djelatnosti, ako:
- a) nabavi, posjeduje, drži i trguje hladnim oružjem kojem je osnovna namjena napad ili nanošenje ozljeda ili nosi takvo hladno oružje na javnom mjestu, osim u svrhu sportskog takmičenja (član 8. stav (3));
- b) nabavi posjeduje, drži i trguje podvodnim puškama i drugim predmetima, koji snagom opruge, napete gume ili sabijenog plina izbacuju osti ili harpun i koji su isključivo namijenjeni ribolovu (član 8. stav (4));
- c) u propisanom roku ne podnese zahtjev za izdavanje odobrenja za držanje oružja (član 24. stav (2));
- d) ne prijavi prodaju oružja kategorije C nadležnoj policijskoj upravi u propisanom roku (član 33. stav (4));
- e) proda oružje kategorije C fizičkom licu koje nije navršilo 21 godinu života (član 33. stav (5));
- f) drži oružje bez odgovarajuće isprave o oružju i isprave o identitetu vlasnika oružja (član 37. stav (1));
- g) ne čuva oružje i municiju na način da nije dostupno maloljetnom ili drugom neovlaštenom licu, a koje nije zaključano i odvojeno u metalnom ormaru, sefu ili sličnom spremištu koje se ne može otvoriti alatom uobičajne upotrebe (član 38. stav (1));
- h) ne čuva oružje i municiju u odgovarajućem prostoru koji se nalazi u mjestu sjedišta vlasnika (član 38. stav (2));
- i) ne donese na ispitivanje i tehnički pregled oružje po pozivu nadležne policijske uprave (član 41. stav (5));
- j) povjeri nošenje oružja i municije fizičkom licu koji nije član lovačke ili streljačke organizacije, odnosno koje ne obavlja poslove zaštite, odnosno čuvanja šuma, lovišta ili ribolovišta i ne ispunjava uslove iz člana 10. stav (2) i (3) ovog zakona (član 42. stav (1));
- k) ne obavijesti u propisanom roku nadležnu policijsku upravu o prestanku potrebe za daljim držanjem oružja i municije ili ne vrati odobrenje za držanje vatrenog oružja ili ne preda oružje (član 43.);
- l) ako prilikom prodaje oružja ili bitnih dijelova u roku od 8 dana ne obavijesti nadležnu policijsku upravu (član 57. stav (2));
- m) o izvršenoj popravci i modifikaciji ili prepravci oružja vlasniku ne izda potvrdu ili u propisanom roku ne obavijesti nadležnu policijsku upravu (član 59. stav (2));
- n) u propisanom roku ne obavijesti Upravu policije o onesposobljavanju oružja (član 64. stav (1));
- o) bez odobrenja policijske uprave pusti u rad civilno strelješte (član 66. stav (1));
- p) na civilnom strelještu da vatreno oružje na korištenje fizičkom licu koje nema odgovarajuću ispravu o oružju (član 67. stav (1));
- r) dozvoli licu koje nema odgovarajuću ispravu o oružju da može vršiti gađanje bez nadzora ovlaštenog lica strelješta ili sa oružjem i municijom koje nije vlasništvo civilnog strelješta (član 67. stav (3));
- s) dozvoli licu pod dejstvom alkohola, opojnih droga ili drugih omamljujućih sredstava ili ako njihovo psihofizičko stanje ukazuje na nesposobnost rukovanja oružjem pristup civilnom strelještu ili omogućiti mu izvođenje gađanja (član 67. stav (4));

- t) na poziv nadležne policijske uprave ne donese vatreno oružje radi uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 69. stav (2));
 - u) u slučaju zamjene bitnih dijelova vatrenog oružja u roku od osam dana ne donese vatreno oružje nadležnoj policijskoj upravi radi ponovnog uzimanja mehaničkog traga vatrenog oružja i unosa u evidenciju o mehaničkom tragu vatrenog oružja (član 69. stav (3));
 - v) ne omogući obavljanje nadzora ili ne da na uvid traženu dokumentaciju ili ne pruži potrebne podatke i obavijesti (član 71. stav (2));
 - z) ne podnese zahtjev za zamjenu isprava o oružju do isteka roka naznačenog u ispravi (član 85.);
 - aa) ne uskladi svoje poslovanje sa odredbama ovog zakona u propisanom roku (član 86. stav (1)).
- (2) Za prekršaj iz stava (1) tačke: a), b), e), h) i j) ovog člana, izriče se i zaštitna mjera oduzimanja oružja, bitnih dijelova, municije i isprava o oružju.
- (3) Za prekršaje iz stava (1) ovog člana kaznit će se novčanom kaznom od 1.000,00 KM do 2.000,00 KM odgovorno lice u pravnom licu.
- (4) Za prekršaje iz stava (1) tačke: a), b), m), n), o) i t) ovog člana, uz novčanu kaznu može se izreći i zaštitna mjera zabrane obavljanja djelatnosti u trajanju od šest mjeseci.

Član 80.

(Novčana kazna za prekršaje pravnih lica i fizičkih lica registriranih za obavljanje djelatnosti)

- (1) Novčanom kaznom od 1.000,00 KM do 3.000,00 KM kaznit će se pravno lice i fizičko lice registrirano za obavljanje djelatnosti, ako:
- a) u propisanom roku ne vrati neiskorišteno odobrenje za nabavljanje i posjedovanje vatrenog oružja i bitnih dijelova kategorije B (član 22. stav (2));
 - b) prije datuma isteka važnosti isprave o oružju ne podnese zahtjev za zamjenu isprave o oružju (člana 25. stav (3));
 - c) ne izvrši odjavu oružja kod nadležne policijske uprave u roku od osam dana od dana prodaje (član 32. stav (6)).
 - d) ne prijavi nadležnoj policijskoj upravi nabavljanje oružja kategorije C u propisanom roku (član 33. stav (2));
 - e) u propisanom roku ne odjavi oružje i ne preda isprave o oružju (član 35. stav (2));
 - f) u propisanom roku ne obavijesti nadležnu policijsku upravu o izvršenoj zamjeni oružja i ne podnese zahtjev za registraciju i izdavanje isprava o oružju (član 35. stav (4));
 - g) sa vatrenim oružjem ne postupa sa naročitom pažnjom (član 36. stav (1));
 - h) ne preda nadležnoj policijskoj upravi vatreno oružje i bitne dijelove za koje ne postoji mogućnost popravke, modifikacije ili popravke (član 39.);
 - i) ne održava oružje u ispravnom stanju, nepravilno i neoprezno rukuje sa oružjem (član 41. stav (1));
 - j) ne izda potvrdu o nošenju, odnosno prenošenju oružja i municije fizičkom licu ili o izdanoj potvrdi ne obavijesti nadležnu policijsku upravu (član 42. stav (4));
 - k) u propisanom roku ne prijavi nestanak ili krađu oružja, bitnih dijelova, municije ili isprava o oružju (član 44. stav (1));
 - l) u propisanom roku ne preda ispravu o oružju nadležnoj policijskoj upravi (član 44. stav (5));
 - m) u propisanom roku ne prijavi promjenu sjedišta ili naziva (član 46.);
 - n) o izvršenoj prodaji municije u propisanom roku ne obavijesti nadležnu policijsku upravu (član 57. stav (4));
 - o) ne vodi propisane evidencije (član 73.);
 - p) ne zamjeni u propisanom roku ispravu o oružju (član 85.).
- (2) Za prekršaj iz stava (1) tačke: b), d), e), g), l), n) i o) ovog člana izriče se i zaštitna mjera oduzimanja oružja, bitnih dijelova, municije i isprava o oružju.
- (3) Za prekršaje iz stava (1) ovog člana kaznit će se novčanom kaznom od 500,00 KM do 1.500,00 KM odgovorno lice u pravnom licu.

Član 81.

(Oduzimanje oružja u slučaju kad se u krivičnom, odnosno prekršajnom postupku, optuženi ne proglasi krivim, odnosno ako ne dođe do pokretanja krivičnog ili prekršajnog postupka)

- (1) Oružje za koje se po odredbama ovog zakona izriče sigurnosna, odnosno zaštitna mjera oduzimanja oružja, bitnih dijelova, municije i isprava o oružju, može se oduzeti i kad se u krivičnom, odnosno prekršajnom postupku, optuženi ne proglasi krivim, o čemu nadležni sud kod kojeg je postupak okončan donosi posebno rješenje o oduzimanju oružja i municije, ako to zahtijevaju interesi opće sigurnosti i morala.
- (2) U svim slučajevima u kojima ne dođe do pokretanja krivičnog ili prekršajnog postupka, nadležna policijska uprava će oduzeti oružje ako to zahtijevaju interesi opće sigurnosti i interesi morala o čemu donosi posebno rješenje.
- (3) Oružje iz stava (1) i (2) ovog člana će se dostaviti Upravi policije radi stavljanja na raspolaganje ili uništenja.

Član 82.

(Oduzimanje i dobrovoljna predaja oružja kategorije A)

- (1) Lice koje dođe u posjed oružja, bitnih dijelova i municije kategorije A, mora takvo oružje, bitne dijelove i municiju, uz prethodnu najavu, dobrovoljno predati nadležnoj policijskoj stanici.
- (2) O vrsti i količini predatog oružja, bitnih dijelova i municije iz stava (1) ovog člana, nadležna policijska stanica izdaje odgovarajuću potvrdu.
- (3) Nadležna policijska stanica dužna je voditi posebnu evidenciju o dobrovoljno predatom oružju, bitnim dijelovima i municiji.
- (4) Protiv lica koje dobrovoljno preda oružje iz stava (1) ovog člana, a prije istražnih radnji policije u skladu sa Zakonom o prekršajima ("Službene novine Federacije BiH", broj: 63/14, 57/22 i 84/22), započinjanju istrage krivičnih djela, te hitnih istražnih radnji u skladu sa Zakonom o krivičnom postupku Federacije Bosne i Hercegovine ("Službene novine Federacije BiH", br. 35/03, 37/03, 56/03, 78/04, 28/05, 55/06, 27/07, 53/07, 9/09, 12/10, 8/13, 59/14 i 74/20), odnosno početkom primjene policijskih ovlaštenja utvrđenih Zakonom o policijskim službenicima Tuzlanskog kantona – prečišćeni tekst ("Službene novine Tuzlanskog kantona", br.7/22 i 17/23) neće se pokretati prekršajni niti krivični postupak.
- (5) U slučaju da lice iz stava (1) ovog člana dobrovoljno ne preda oružje, bitne dijelove i municiju kategorije A, nadležna policijska stanica će postupiti u skladu sa odredbama Krivičnog zakona Federacije Bosne i Hercegovine ("Službene novine Federacije BiH", broj: 36/03, 21/2004 - ispr., 69/04, 18/05, 42/10, 42/11, 59/14, 76/14, 46/16, 75/17 i 31/23).
- (6) Oružje, bitne dijelove i municiju kategorije A, nadležna policijska uprava će oduzeti i kad o istima nije odlučeno u sudskom postupku ili kad se u sudskom postupku optuženi ne proglasi krivim, odnosno ako ne dođe do pokretanja krivičnog postupka, o čemu se donosi posebno rješenje.
- (7) Oružje, bitni dijelovi i municija kategorije A će se uništiti.

DIO TREĆI – PRELAZNE I ZAVRŠNE ODREDBE

Član 83.

(Amnestija i legalizacija oružja)

- (1) Lice koje na dan stupanja na snagu ovog zakona posjeduje oružje kategorije B i C koje prema ranije važećim propisima nije registrovano odnosno prijavljeno, takvo oružje mora predati nadležnoj policijskoj stanici.
- (2) Sa licem koje dobrovoljno preda oružje iz stava (1) ovog člana, postupat će se u skladu sa članom 82. stav (4) ovog Zakona.
- (3) Lice iz stava (1) ovog člana može u roku od 12 mjeseci od dana stupanja na snagu ovog zakona nadležnoj policijskoj upravi podnijeti zahtjev za registraciju i izdavanje isprave o oružju.
- (4) Do okončanja postupka po podnesenom zahtjevu iz stava (3) ovog člana oružje se čuva u nadležnoj policijskoj stanici.
- (5) Prilikom podnošenja zahtjeva iz stava (3) ovog člana lice nije dužno da dokazuje porijeklo oružja.
- (6) Isprava o oružju neće se izdati licu koje ne ispunjava uslove iz člana 10. stav (2) i (3) ovog Zakona, kao i kada se oružje potražuje od nadležnih organa i u slučaju da je oružje već registrovano.
- (7) U slučaju iz stava (6) ovog člana nadležna policijska uprava će oduzeti oružje o čemu se donosi rješenje.
- (8) Nakon pravosnažnosti rješenja iz stava (7) ovog člana oružje će se dostaviti Upravi policije radi uništenja, izuzev oružja za koje je utvrđeno da se potražuje od nadležnih organa, te za registrovano oružje.
- (9) Mjere i radnje koje poduzima policijska uprava na provođenju amnestije za nelegalno posjedovanje oružja, kao i u vezi legalizacije oružja, uredit će se pravilnikom koji donosi ministar na prijedlog direktora Uprave policije.

Član 84. **(Podzakonski akti)**

U roku od godinu dana od dana stupanja na snagu ovog zakona, na prijedlog direktora Uprave policije, ministar će donijeti:

- a) Pravilnik o izgledu i sadržaju obrazaca isprava o oružju i zahtjeva za izdavanje isprava o oružju i drugih dokumenata (član 9. stav (4));
- b) Pravilnik o postupku rješavanja zahtjeva za izdavanje odobrenja za nabavljanje i posjedovanje oružja, izdavanje i zamjena isprava o oružju, kao i postupak izdavanja potvrda, obavještenja i drugih dokumenata (član 9. stav (5));
- c) Pravilnik o postupku rješavanja zahtjeva za provođenje obuke u rukovanju oružjem, odobrenja za obavljanje djelatnosti (trgovina, popravljanje, modifikacija ili prepravljanje i onesposobljavanje oružja) i odobrenja za osnivanje civilnih strelišta (član 9. stav (6));
- d) Pravilnik o imenovanju i načinu rada komisija i drugih učesnika u postupku ocjene ispunjavanja uslova i opravdanosti zahtjeva za izdavanje odobrenja i isprava o oružju (član 9. stav (7));
- e) Pravilnik o smještaju i čuvanju oružja i municije (član 9. stav (8));
- f) Pravilnik o programu obuke i načinu osposobljavanja za pravilno rukovanje oružjem i poznavanje propisa u vezi držanja, čuvanja i nošenja vatrenog oružja, imenovanje i način rada komisije (član 15. stav (3));
- g) Pravilnik o nabavci i posjedovanju vatrenog oružja kategorije B za obavljanje poslova pravnih lica koja obavljaju poslove zaštite ljudi i imovine, korisnika lovišta koji ima osnovanu lovočuvarsku službu i pravnih lica koja obavlja poslove zaštite i čuvanja šuma i šumskih zemljišta (član 17. stav (4)).
- h) Pravilnik o postupku oduzimanja oružja, bitnih dijelova, municije i isprava o oružju, kao i način postupanja sa oružjem, bitnim dijelovima, municijom i ispravama o oružju nakon provedenog upravnog postupka (član 49. stav (8));
- i) Pravilnik o načinu čuvanja oduzetog oružja, bitnih dijelova, municije i isprava o oružju i načinu postupanja sa oduzetim oružjem, bitnim dijelovima, municijom i ispravama o oružju (član 52. stav (2));
- j) Pravilnik o načinu raspolaganja oružjem i municijom oduzetim u upravnom, prekršajnom i krivičnom postupku (član 53. stav (9));
- k) Pravilnik o onesposobljavanju vatrenog oružja (član 64. stav (4));

- l) Pravilnik o prostornim i tehničkim uslovima za čuvanje, smještaj i upotrebu oružja i municije na civilnim streljštima, broj i vrsta oružja u vlasništvu civilnog streljšta, način korištenja oružja na civilnom streljštu i vođenje civilnog streljšta (član 66. stav (7));
- m) Pravilnik o načinu uzimanja, evidentiranja, pohranjivanja i čuvanja mehaničkog traga vatrenog oružja (član 69. stav (5));
- n) Pravilnik o načinu imenovanja, broju članova i sastavu komisije za nadzor, nadležnost i način rada, kao i drugih pitanja od značaja za rad komisije (član 70. stav (3));
- o) Pravilnik o obrascima, sadržaju i načinu vođenja evidencija policijske uprave (član 72. stav (3));
- p) Pravilnik o obrascima, sadržaju i načinu vođenja evidencija pravnih i fizičkih lica registrovanim za obavljanje djelatnosti, uključujući i sportske streljačke i lovačke organizacije (član 73. stav (11));
- r) Pravilnik o obliku, sadržaju i načinu vođenja elektronske baze podataka za Tuzlanski kanton (član 74. stav (7)).
- s) Pravilnik o mjerama i radnjama koje poduzima policijska uprava na provođenju amnestije za nelegalno posjedovanje oružja, kao i u vezi legalizacije oružja (član 83. stav (9));
- (2) U roku od godinu dana od dana stupanja na snagu ovog zakona ministar zdravstva Tuzlanskog kantona donijet će Pravilnik o uslovima koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost za držanje i nošenje oružja (član 13. stav (4)) uz saglasnost ministar.

Član 85.

(Važenje i zamjena isprava o oružju)

- (1) Isprave o oružju izdate prema ranijim propisima važe do isteka roka naznačenog u ispravi.
- (2) Lica koja u trenutku stupanja na snagu ovog zakona imaju oružni list za držanje i nošenje oružja, izdat od nadležnog organa u Bosni i Hercegovini, u skladu sa Zakonom o nabavljanju, držanju i nošenju oružja i municije ("Službene novine Tuzlanskog kantona", br. 11/08, 14/09, 4/10, 11/11 i 17/13), a čiji rok važenja je istekao odnosno imaju odobrenja za držanje oružja čiji rok nije propisan, ili oružni list odnosno odobrenje za držanje oružja izdato po propisima koji su bili na snazi prije stupanja na snagu navedenog zakona, dužna su podnijeti zahtjev za izdavanje oružnog lista odnosno odobrenja za držanje vatrenog oružja u skladu sa ovim zakonom, najkasnije do 31.12.2024. godine, izuzev imalaca oružja čije je oružje oduzeto, uništeno ili prodato.
- (3) Postupak zamjene isprava o oružju provodi se u skladu sa članom 25. ovog zakona.

Član 86.

(Usklađivanje obavljanja djelatnosti)

- (1) Pravno lice i fizičko lice registrirano za obavljanje djelatnosti prometa oružja i municije, popravljanja, modifikacije ili prepravljanja i onespособljavanja oružja ili vođenje civilnih streljšta i obavljanje drugih djelatnosti u skladu sa ovim zakonom, dužno je svoje poslovanje uskladiti sa odredbama ovog zakona u roku od godinu dana od dana stupanja na snagu ovog zakona.
- (2) Pravnom licu i fizičkom licu registriranom za obavljanje djelatnosti, koji u roku iz stava (1) ovog člana, ne podnese zahtjev za usklađivanje poslovanja sa odredbama ovog zakona, nadležni organ će rješenjem zabraniti dalje obavljanje djelatnosti.

Član 87.

(Odluka o načinu raspolaganja sa oružjem)

(1) Direktor Uprave policije će na prijedlog Komisije iz člana 48. stav (7) Zakona o oružju i municiji ("Službene novine Tuzlanskog kantona", broj: 17/15, 5/16, 17/17, 8/20, 19/21 i 19/22) donijeti o odluku o načinu daljeg raspolaganja sa oružjem.

(2) Odluka iz stava (1) ovog člana donijet će se i u slučaju kada je riječ o oružju za koje se ne može dokazati porijeklo, a na prijedlog organizacionih jedinica u čijim depozitima odnosno magacinima se nalazi takvo oružje.

Član 88. (Zaštita podataka)

Svi subjekti koji na bilo koji način primjenjuju odredbe ovog zakona dužni su da prikupljaju, pohranjuju i obrađuju podatke u skladu sa propisima kojima se uređuje zaštita ličnih podataka i zaštita tajnih podataka.

Član 89. (Uspostavljanje elektronske baze podataka)

U roku od jedne godine dana od dana stupanja na snagu ovog Zakona Uprava policije će uspostaviti elektronsku bazu podataka iz člana 74. ovog zakona.

Član 90. (Postupci započeti prije stupanja na snagu ovog zakona)

Svi postupci koji su započeti a nisu okončani do dana stupanja na snagu ovog zakona okončat će se u skladu sa ovim zakonom.

Član 91. (Gramatička terminologija)

Gramatička terminologija korištenja muškog i ženskog roda za pojmove sadržane u ovom zakonu podrazumijeva uključivanje oba spola.

Član 92. (Prestanak važenja)

(1) Danom stupanja na snagu ovog zakona prestaje primjena Zakona o oružju i municiji ("Službene novine Tuzlanskog kantona", broj: 17/15, 5/16, 17/17, 8/20, 19/21 i 19/22).

(2) Podzakonski akti doneseni na osnovu Zakona iz stava (1) ovog člana primjenjivat će se ukoliko nisu u suprotnosti sa ovim zakonom, do donošenja podzakonskih akata na osnovu ovog zakona.

Član 93. (Stupanje na snagu)

Ovaj zakon stupa na snagu tridesetog dana od dana objavljivanja u "Službenim novinama Tuzlanskog kantona".

**Predsjednik Skupštine
Tuzlanskog kantona**

Broj:
Datum:

Žarko Vujović

OBRAZLOŽENJE

ZAKONA O ORUŽJU I MUNICIJI

I – PRAVNI OSNOV

Pravni osnov za donošenje ovog Zakona sadržan je u članu 24. stav (1) tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04).

II – RAZLOZI ZA DONOŠENJE ZAKONA

Razlozi za donošenje ovog Zakona temelje se na potrebi usklađivanja postojećeg Zakona o oružju i municiji sa pravnom regulativom (*Aquis Comunitaire*) Evropske unije. Bez obzira što je 2010. godine urađen nacrt Zakona o oružju BiH i isti nije usvojen, i dalje je ostala obaveza kantona da donesu Zakon o oružju na kantonalnim nivoima, te potreba za usklađivanjem istih sa Direktivama Vijeća EU. S obzirom da je od strane Direkcije za evropske integracije-Sektor za usklađivanje pravnog sistema Bosne i Hercegovine izrađena tabela usklađenosti sa pravnom tečevinom Evropske unije, prilikom izrade prijedloga rukovalo se navedenim uputama. Također, od strane Ministarstva sigurnosti dostavljen je Zakon o oružju i municiji Unsko-Sanskog kantona koji je korišten kao osnova i smjernica za donošenje Zakona o oružju na nivou Tuzlanskog kantona.

III - OBRAZLOŽENJE PREDLOŽENIH RJEŠENJA

U **prvom dijelu** propisan je predmet regulisanja i svrha donošenja ovog Zakona, zatim su definisani pojmovi korišteni u Zakonu, te pitanja koja se tiču njegove primjene izuzetaka u primjeni.

U **drugom dijelu** definisana je kategorizacija oružja na tri kategorije, te ograničenja u pogledu navedenih. Kroz poglavlje I i II preciziran je postupak rješavanja zahtjeva stranaka, te izdavanja odobrenja za nabavljanje i posjedovanje vatrenog oružja i bitnih dijelova oružja. Takođe propisana je potrebna zdravstvena sposobnost u pogledu rukovanja, držanja i nošenja vatrenog oružja, te postupak u pogledu rješavanja zahtjeva pravnih i fizičkih lica kada su upitanju navedene procedure. Takođe u odnosu na važeći zakon propisana je mogućnost spravljanja municije, te nabavljanja eksplozivnih materija u navedene svrhe. U istom dijelu u poglavlju III propisan je postupak sa oružjem i municijom kada je u pitanju prodaja, poklon i onesposobljavanje oružja i municije. Osim navedenog, definisana je zabrana nošenja oružja, čuvanje oružja i municije, rukovanje i upotreba, kao i ostali postupci sa oružjem, bitnim dijeovima, municijom i isprava o oružju. U istom dijelu u poglavlju IV propisano je oduzimanje vatrenog oružja, bitnih dijelova, municije i isprava o oružju, te postupanje sa predatim oružjem, bitnim dijelovima, municijom i ispravama o oružju. U V poglavlju precizirana je trgovina oružjem, te šta se smatra trgovcem oružjem i posrednikom. U VI poglavlju propisan je postupak onesposobljavanja vatrenog oružja, dok su u VII poglavlju definisana civilna strelišta u pogledu njihovog osnivanja i upotrebe oružja. U VIII poglavlju propisano je uzimanje mehaničkog traga vatrenog oružja, dok se poglavlje IX odnosi na nadzor nad primjenom ovog Zakona. U X poglavlju propisane su evidencije koje vodi nadležni organ, te evidencije pravnih i fizičkih lica. U XI poglavlju propisane su kaznene odredbe u slučaju nepoštivanja ovog Zakona.

U trećem dijelu propisane su prelazne i završne odredbe, između ostalog i obaveza donošenja podzakonskih akata za implementaciju ovog propisa, te zamjena isprava o oružju izdatih u skladu sa ranijim propisima.

IV – OPIS KONSULTACIJA VOĐENIH U PROCESU IZRADE PROPISA

Prilikom izrade prijedloga Zakona o oružju i municiji, tekst propisa je dostavljen organizacionim jedinicama Uprave policije na uvid radi davanja prijedloga, primjedbi i sugestija na sadržaj istog. Također, u obzir je uzet zaključak Skupštine TK u čijem prilogu je Izvod iz transkripta sa 13. sjednice Skupštine TK od 24.07.2023. godine. S tim u vezi, u dijelu diskusije zastupnika Zukić Muamera a koji se odnosi na obavještanje policije o smrti vlasnika oružja, taj sistem obavještanja je kroz praktični dio rada uspostavljen, na način da matični uredi nakon dostavljanja Odsjecima za administraciju obavijesti o smrti, isti navedeno dostavljaju stručnim saradnicima za provođenje propisa o oružju, a što će biti detaljno regulisano podzakonskim propisom. U prijedlogu zakona je normirano u članu 46. stav (2) da će nadležna policijska uprava odmah po saznanju o smrti vlasnika oružja, i prije isteka roka iz stava (1) ovog člana (u roku od 30 dana od dana smrti vlasnika nadležnoj policijskoj upravi predati na čuvanje oružje, bitne dijelove, municiju i isprave o oružju) poduzeti potrebne mjere i radnje na preuzimanju oružja. Također, u dijelu koji se odnosi na odgovornost supružnika ili člana porodice da postupi sa oružjem u slučaju smrti, prilikom rješavanja zahtjeva za izdavanje odobrenja za nabavljanje i posjedovanje oružja policijski službenici će tokom vršenja terenske provjere obavljati razgovore sa članovima porodice iz istog domaćinstva i tom prilikom iste upoznavati sa odredbama Zakona o oružju, a što će biti detaljno regulisano podzakonskim propisom čije donošenje je predviđeno u članu 8. stav (5) predmetnog prijedloga.

U pogledu izvještaja Skupštine TK i predloženih primjedbi, iste su uvažene te je tekst propisa korigovan.

Kroz tekst propisa, a u cilju usklađivanja Zakona međusobno i sa pravnom stečevinom EU, usvojena su rješenja predviđena izvještajem Radne grupe za harmonizaciju propisa o oružju i municiji međusobno i sa pravnom stečevinom EU, formirane od strane Vijeća ministara BiH, izvršene su korekcije kako slijedi:

- u članu 3. stav (1) tačka u) izvršeno je brisanje „oružja na daljinu“ jer je uslijedila i promjena kroz kategoriju C gdje je ova vrsta oružja dozvoljena uz prijavu, a u postojećem nacrtu je bila svrstana kroz hladno oružje koje je zabranjeno, te u smislu ujednačavanja pravnih normi bilo je neophodno izvršiti ovu korekciju.
- u pogledu člana 5. koji se odnosi na izuzetke u primjeni izvršena je korekcije u smislu da je licima mlađim od 18 godina, zabranjeno nabavljati, držati i nositi električni paralizator snage ispod 10.000 Volti, sprej za omamljivanje, , vazdušno oružje čija je kinetička energija manja od 10,5 J ili je brzina projektila manja od 200 m/s i kalibra 4,5mm, oružje sa tetivom čija je sila zatezanja tetive manja od 450 Njutna, odnosno čija je natezna težina manja od 101 libre/45 kilograma i airsoft i paintball naprave.
- u članu 7. koji se odnosi na kategorizaciju oružja, kategorija A je proširena na poluautomatsko vatreno oružje za civilnu upotrebu koje je slično oružju s automatskim mehanizmom osim onog navedenog u tački 8., 9. i 10. ovog člana; sve vrste oružja s integralnim prigušivačima, prigušivači

namjenjeni oružju i dijelovi za prigušivače i ostalo vatreno oružje koje nije obuhvaćeno ostalim kategorijama. Također, kategorija C je izmjenjena u cilju usklađivanja sa Direktivom EU broj: 2021/555, te sada u ovu kategoriju spada: svako vatreno oružje u ovoj kategoriji koje je prepravljeno da ispaljuje streljivo bez projektila, neškodljive nadražujuće tvari, druge aktivne tvari ili pirotehničko streljivo ili u paradno ili akustično oružje; vatreno oružje razvrstano u kategoriju A ili B ili u ovu kategoriju koje je onesposobljeno u skladu s Provedbenom uredbom (EU) 2015/2403; Paradno i akustično oružje; Oružje s tetivom čija je sila zatezanja tetive veća od 450 N ili veća, odnosno čija je natezna težina veća od 101 libre/45 kg ili veća; Vazdušno oružje čija je kinetička energija 10,5 J ili veća ili je brzina projektila 200 m/s ili veća i kalibra većeg od 4,5mm; Prangija; Trofejno oružje; Električni paralizatori preko 10.000 volti; Signalno oružje; Plinsko oružje/gasno oružje i Reprodukcijsko oružje.

- u članu 8. izvršena je korekcija u pogledu nošenja hladnog kojem je osnovna namjena napad ili nanošenje ozljeda na javnom mjestu, na način da se ova zabrana odnosi na šire područje a ne samo na javno mjesto kako je to bilo propisano nacrtom.

- član 51. stav (2) tačka f) koji se odnosi na privremeno oduzimanje oružja proširen je i na okolnosti koje negativno utiču na javni red i mir, odnosno interese sigurnosti, kao i da ne postoje druge okolnosti koje ukazuju da bi oružje moglo biti zloupotrijebljeno, kao što je: prekomjerno uživanje alkohola, konzumacija opojnih droga ili drugih omamljujućih sredstava, izraženo poremećeni porodični odnosi, sukobi s okolinom, agresivno i ekscesno ponašanje i drugi poremećaji u ponašanju, kriminalističko - obavještajni razlozi i razlozi koji ukazuju na povezanost sa licima iz kriminalističko - obavještajne evidencije i slično.

- u članu 64. stav (2) proširen je sadržaj obavijesti o onesposobljenom vatrenom oružju koja se dostavlja nadležnoj PU (datum deaktivacije i identitet deaktivacijskog centra).

- u članu 65. stav (3) oznaka vatrenog oružja koje je prepravljeno radi onesposobljavanja definisana je po standardima EU i glasi: „oznaka deaktivacije „D“; ISO oznaka „BA“; simbol subjekta verifikacije „TK“ i godina verifikacije.

U vezi navedenog zakona održana je i javna rasprava, nakon čega je održan okrugli sto kako bi se utvrdili prijedlozi i sugestije te sumirali rezultati javne rasprave u cilju izrade što kvalitetnijeg zakonskog rješenja.

U pogledu navedene rasprave pristigle su prijedlogi gradskog vijeća Grada Tuzla koje se odnose na sljedeće:

- ukidanje ograničenja broja oružja iz člana 8. za držaoca lovačkog i sportskog oružja, koja primjedba nije uvažena iz razloga što ne postoji nikakva zabrana u broju oružja s obzirom na direktive EU, međutim smatramo da je 12 komada oružja za jedno fizičko lice više nego dovoljno. Dosadašnja praksa je pokazala da fizička lica nisu u mogućnosti da vode računa o važenju oružnog lista za navedenih 12 komada, te smatramo zahtjev za neograničenim brojem komada oružja neopravdanim.

- produženje roka iz člana 12. za dostavljanje dokaza o ispunjenju posebnih uslova za nabavljanje oružja sa 60 dana na 120 dana, nije uvaženo. Naime, shodno Zakonu o upravnom postupku, a koji se primjenjuje i u postupcima regulisanim Zakonom o oružju i municiji, najduži rok za rješavanje upravne stvari iznosi 60 dana. Samim tim ovaj rok smatramo maksimalnim i za dostavu dokumentacije u postupku, a koji smatramo i dovoljnim za lice koje je zainteresovano za nabavku vatrenog oružja.

- izmjena stava (4) u članu 11. kojim se traži da fizičko lice ima opravdan razlog za nabavljanje i posjedovanje lovačkog oružja ukoliko je član lovačke organizacije i ukoliko ima položen lovački ispit, što dokazuje uvjerenjem izdatim od strane lovačke organizacije u kojem se navodi da je to lice aktivan član lovačke organizacije i da je položilo lovački ispit u skladu sa važećim propisima za polaganje lovačkih ispita u vrijeme polaganja ispita. Navedeno nije uvaženo jer postupak izdavanja uvjerenja o položenom lovačkom ispitu potpisuje i njegov sadržaj propisuje Federalni ministarstar poljoprivrede, vodoprivrede i šumarstva a što je regulisano Zakonom o lovstvu FBiH. Dakle činjenice da je neko položio lovački ispit dokazuju se tim uvjerenjem a ne konstatacijom na samom uvjerenjem o članstvu u lovačkom društvu kako je to predloženo.

- da se član 25. mijenja na način: “(1) Oružni list i odobrenje za držanje vatrenog oružja izdaje nadležna policijska uprava. (3) Nakon izdavanja oružnog lista nadležna PU svakih 5 godina po službenoj dužnosti uvidom u podatke iz službenih evidencija nadležnih pravosudnih tijela provjerava ispunjava li vlasnik oružja i dalje u slove iz člana 10 stav (2) tačke d), e) i f)“. Navedeni prijedlog nije uvršten u tekst zakona iz razloga što je nabavka vatrenog oružja volja i pravo građanina uz ispunjenje određenih uslova a ne obaveza. S tim u vezi periodično preispitivanje Odobrenja u vremenskim razmacima koji nisu duži od pet godina vršit će se na zahtjev nosioca oružja ukoliko mu je interes na posjeduje vatreno oružje. Taj teret se ne može ostaviti na MUP a što je u skladu i sa direktivama EU.

- da se iz člana 37. stav (6) briše odrerdba o količini opojnih sredstava i supstanci obzirom na različite mjerne jedinice, prijedlog je uvažen i navedeni član je korigovan.

- da se u članu 47. stav (5) rok za podnošenje zahtjeva za nabavku oružja od strane nasljednika nakon pravosnažnosti rješenja o nasljeđivanju sa 12 mjeseci poveća na 18 mjeseci, što je i uvaženo te je izvršena korekcija ovog člana.

- izmjena člana 48. kako bi se rok od 3 godine za okončanje ostavinskog postupka a po isteku kojeg se donosi rješenje kojim se oružje, bitni dijelovi i municija dodjeljuju Upravi policije na raspolaganje, poveća na 5 godina. Isto nije uvaženo, jer postojeći rok smatramo dovoljnim.

U pogledu prijedloga pristiglih od strane Saveza lovačkih društava TK, a koji su identični prijedlozima Gradskog vijeća Grada Tuzla u dijelu koji se odnosi na članove 7., 11., 12. i 25. isti nisu uvaženi iz prethodno navedenih razloga obrazloženih za primjedloge gradskog vijeća Grada Tuzla.

Prijedlozi pristigli od Općine Kladanj odnose se na:

- dodavanje električnih paralizatora ispod 10100 V u članu 5. Isto nije uvaženo jer električni paralizator preko 10.000 V uvršten je u kategoriju C koju će moći navaljati samo lice sa navršenih 21 godinom života, a električni paralizator ispod 10.000 V bit će dozvoljen licima iznad 18 godina i neće se morati prijavljivati.

- prijedlog da se u članu 11. stav (4) poslije teksta „što dokazuje uvjerenjem o članstvu u lovačkom društvu“ briše zarez i doda riječ „ili“ iz razloga što se članstvo u lovačkoj organizaciji može dokazivati članskom knjižicom ili uvjerenjem o članstvu. Navedeno nije uvaženo iz razloga što se shodno članu 169. Zakona o upravnom postupku činjenice dokazuju uvjerenjima o kojima se vode službene evidencije, te sama članska knjižica nije dovoljna za dokazivanje ovog statusa.

- prijedlog da se u članu 12. rok za ispunjenje posebnih uslova za nabavku vatrenog oružja produži sa 60 na 120. dana. Navedeno nije uvaženo jer shodno Zakonu o upravnom postupku a koji se primjenjuje i u postupke regulisane Zakonom o oružju i municiji, najduži rok za rješavanje upravne

stvari iznosi 60 dana. Samim tim ovaj rok smatramo maksimalnim i za dostavu dokumentacije u postupku, a koji smatramo i dovoljnim za lice koje je zainteresovano za nabavku vatrenog oružja.

- prijedlog za izmjenu člana 13. je kroz tekst propisa već uvršten.
- prijedlog da se rok važenja oružnog lista iz člana 25. stav (1) sa 5 godina produži na 10 godina. Navedeno nije uvaženo. Naime, MUP će svakako u skladu sa Zakonom pratiti ponašanje lica koja su nosioci vatrenog oružja. Međutim Direktivom Europskog Parlamenta i Vijeća Europske unije od 24.03.2021.godine o nadzoru nabavke i posjedovanja oružja broj: 2021/555 u članu 9 propisano je da se Odobrenja periodično preispituju u vremenskim razmacima koji nisu dulji od pet godina. Samim tim ni oružni list ne može važiti duže.
- prijedlog da se u članu 47. stav (5) rok za podnošenje zahtjeva za nabavku oružja od strane nasljednika nakon pravosnažnosti rješenja o nasljeđivanju sa 12 mjeseci poveća na 24 mjeseci, što nije uvaženo jer je taj rok već povećan sa 12 mjeseci na 18 mjeseci i navedeni smatramo objektivnim.
- prijedlog da se izmjeni član 48. kako bi se rok od 3 godine za okončanje ostavinskog postupka, a po isteku kojeg se donosi rješenje kojim se oružje, bitni dijelovi i municija dodjeljuju Upravi policije na raspolaganje, poveća na 5 godina. Isto nije uvaženo, jer postojeći rok smatramo dovoljnim.

U pogledu inicijative pristigle od građanina Mehmedbegović Raifa koja se između ostalog odnosi na razloge za pristupanje donošenju ovog Zakona, način izrade zakona u pogledu Pravila za izradu zakona, svrhe donošenja zakona, postupanje suda po oduzimanju oružja te ostalih primjedbi kojima je imenovani na općenit način iskazao svoje lično nezadovoljstvo zakonom, a koja nije uvažena jer ne postoje konkretna rješenja te se ista neće posebno ni obrazlagati, izuzev prijedloga za zabranu nošenja oružja u obrazovno-odgojnim ustanovama a što je definisano i uvršteno te definisano u članu 37. Zakona.

V – FINANSIJSKI IZVJEŠTAJ

Za navedeni Zakon izrađena je fiskalna procjena u skladu sa članom 8. Zakona o izvršenju budžeta TK od strane Sektora za materijalno-finansijske i opće poslove.

OBRAZAC IZJAVA O FISKALNOJ PROCJENI

Obrazac IFP NE

A 1. Obradivač propisa

Razdjel	KOD	NAZIV
1702		MINISTARSTVO UNUTRASNJIH POSLOVA-UPRAVA POLICIJE

B 2. Osnovni podaci o prijedlogu propisa

Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
Naziv propisa/akta	Prijedlog Zakona o oruzju i municiji					

C 3. Izjava o nepostojanju dodatnih fiskalnih efekata predloženog propisa

Prihvatanje, odnosno provođenje, Prijedloga Zakona o oruzju i municiji, nema i neće rezultirati fiskalnim učinkom na Budžet potrošačke jedinice 17020001- Uprava policije. Za primjenu istog trenutno nije potrebno osigurati dodatna finansijska sredstva.

D 4. Pečat i potpis odgovornog lica obrađivača, odnosno predlagača propisa

Mjesto i datum

15.05.2024.godine.

